

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः (वाक्य सहित)

तृतीयकाण्डे चतुर्थः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Table of Contents

3 कृष्ण यजुर्वेदीय तैत्तिरीय संहितायं पद पाठे तृतीयं काण्डं ... 3

3.4 तृतीयकाण्डे चतुर्थः प्रश्नः – इष्टिहोमाभिधानं..... 3

पद पाठे (वाक्य सहित) – तृतीयकाण्डे – चतुर्थः प्रश्नः

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

3 कृष्ण यजुर्वेदीय तैत्तिरीय संहितायं पद पाठे

तृतीयं काण्डं

3.4 तृतीयकाण्डे चतुर्थः प्रश्नः – इष्टिहोमाभिधानं

3.4.1.1

वि वा ए॒तस्य॑ य॒ज्ञ ऋ॑ध्यते यस्य॑ ह॒विर॑तिरिच्यते॑ सूर्यो॑ दे॒वो
दि॒विष॑द्भ्य इत्याह॑ बृ॒हस्प॑तिना चै॒वास्य॑ प्र॒जाप॑तिना च य॒ज्ञस्य॑
व्यृ॒द्धम॑पि व॒पति॑ रक्षा॑सि वा ए॒तत् प॑शु॒ः स॑चन्ते यदे॒कदे॒वत्य॑
आल॑ब्धो भू॒यान् भ॑वति यस्या॑स्ते ह॒रितो॑ गर्भ॑ इत्याह॑ दे॒वत्रै॑वैनां॑
गम॑यति रक्ष॑साम॒पह॑त्या आ॒ वर्त॑न वर्त॑येत्याह॑ – [] 1

3.4.1.1 - Padam

वी॒ति । वै । ए॒तस्य॑ । य॒ज्ञः । ऋ॑ध्यते । यस्य॑ । ह॒विः ।
अ॒तिरि॑च्यत इत्य॑ति – रिच्य॑ते । सूर्यः॑ । दे॒वः ।

दिवि॒षद्भ्य॒ इति॑ दिवि॒षत् – भ्यः॑ । इति॑ । आ॒ह । बृ॒हस्प॑ति॒ना । च॒ ।
ए॒व । अ॒स्य । प्र॒जाप॑ति॒नेति॑ प्र॒जा – प॒तिना॑ । च॒ । य॒ज्ञस्य॑ ।
व्यृ॒द्धमि॑ति॒ वि – ऋ॒द्धम् । अ॒पीति॑ । व॒पति॑ । र॒क्षाँ॑सि । वै । ए॒तत् ।
प॒शुम् । स॒चन्ते॑ । यत् । ए॒कदे॑व॒त्य इत्ये॑क – दे॒वत्यः॑ । आ॒लब्ध॑
इत्या – ल॒ब्धः । भू॒यान् । भ॒वति॑ । य॒स्याः॑ । ते । ह॒रितः॑ । गर्भः॑ ।
इति॑ । आ॒ह । दे॒वत्रे॑ति॒ देव – त्रा॑ । ए॒व । ए॒नाम् । ग॒मय॑ति ।
र॒क्षसाम् । अ॒पह॑त्या इत्य॒प – ह॒त्यै । ए॒ति । व॒र्तन॑ । व॒र्तय॑ । इति॑ ।

आ॒ह । १ (५०)

3.4.1.2

ब्र॒ह्मणै॒वैन॑मा॒ वर्त॑यति॒ वि ते॑ भि॒नद्भि॑ त॒करी॑मित्या॒ह यथा॑य॒जुरे॒वैतदु॑-
रु॒द्रप्सो॑ वि॒श्वरूप॑ इ॒न्दुरि॑त्या॒ह प्र॒जा वै प॒शव॑ इ॒न्दुः प्र॒जयै॒वैनं॑
प॒शुभिः॑ स॒मर्ध॑यति॒ दिवं॑ वै॒ यज्ञ॑स्य॒ व्यृ॒द्धं ग॑च्छति॒ पृथि॑वीमति॒रिक्तं॑
तद्य॒न्न श॑मये॒दार्ति॑मा॒र्च्छेद्-य॑ज॒मानो॑ म॒ही द्यौः॑ पृथि॒वीच॑ न
इत्या – [] २

3.4.1.2 - Padam

ब्र॒ह्म॒णा । ए॒व । ए॒नम् । ए॒ति । व॒र्त॒य॒ति । वी॒ति । ते । भि॒न॒द्भि ।
त॒क॒री॒म् । इ॒ति । आ॒ह । य॒था॒य॒जु॒रि॒ति॒ यथा – य॒जुः । ए॒व । ए॒तत् ।
उ॒रु॒द्र॒प्स इ॒त्यु॒रु – द्र॒प्सः । वि॒श्व॒रूप॒ इति॒ विश्व – रूपः । इ॒न्दुः ।
इ॒ति । आ॒ह । प्र॒जे॒ति॒ प्र – जा । वै । प॒श॒वः । इ॒न्दुः । प्र॒ज॒ये॒ति॒
प्र – ज॒या॒ ॥ ए॒व । ए॒नम् । प॒शु॒भि॒रि॒ति॒ प॒शु – भिः । स॒मि॒ति॒ ।
अ॒र्ध॒य॒ति॒ ॥ दि॒वम् । वै । य॒ज्ञ॒स्य॒ । व्यृ॒द्ध॒मि॒ति॒ वि॒-ऋ॒द्धम् । ग॒च्छ॒ति॒ ।
पृ॒थि॒वी॒म् । अ॒ति॒रि॒क्त॒मि॒त्य॒ति॒ – रि॒क्तम् । तत् । यत् । न । श॒म॒यै॒त् ।
आ॒र्ति॒म् ॥ ए॒ति॒ । ऋ॒च्छे॒त् । य॒ज॒मा॒नः । म॒ही । द्यौः । पृ॒थि॒वी । च ।
नः । इ॒ति॒ । 2 (50)

3.4.1.3

ह द्या॒वा॒पृ॒थि॒वी॒भ्या॒मे॒व य॒ज्ञ॒स्य॒ व्यृ॒द्धं॒ चा॒ति॒रि॒क्तं॒ च श॒म॒य॒ति॒
नाऽऽ*॒र्ति॒मा॒च्छ॒ति॒ य॒ज॒मा॒नो भ॒स्म॒नाऽभि॒ स॒मू॒ह॒ति॒ स्व॒गा॒कृ॒त्या अ॒थो
अ॒न॒यो॒र्वा ए॒ष ग॒र्भो॒ऽन॒यो॒रे॒वैनं॑ द॒धा॒ति॒ यद॒व॒द्ये॒दति॒ तद्रे॒च॒ये॒द्यन्ना॒व॒द्ये॒त्

प॒शो॒राल॑ब्धस्य॒ ना॒व॒ द्ये॒त् पुर॑स्ता॒न्नाभ्या॑ अ॒न्यद॑वद्येदु॒परि॑ष्ठाद॒न्यत्
पुर॑स्ता॒द्वै नाभ्यै॑ – [] 3

3.4.1.3 - Padam

आ॒ह । द्या॒वापृ॑थि॒वीभ्या॑मि॒ति द्या॒वा – पृ॑थि॒वीभ्या॑म् । ए॒व । य॒ज्ञस्य॑ ।
व्यृ॒द्धमि॒ति वि – ऋ॒द्धम् । च । अति॑रि॒क्तमि॒त्यति॑ – रि॒क्तम् । च ।
श॒मय॑ति । न । आ॒र्तिम् । ए॒ति । ऋ॒च्छति॑ । य॒जमा॑नः । भ॒स्मना॑ ।
अ॒भि । स॒मि॒ति । ऊ॒हति॑ । स्व॒गाकृ॑त्या इति॑ स्व॒गा – कृ॒त्यै ।
अथो॑ इति॑ । अ॒नयोः॑ । वै । ए॒षः । गर्भः॑ । अ॒नयोः॑ । ए॒व । ए॒नम् ।
द॒धाति॑ । यत् । अ॒वद्ये॑दित्य॒व-द्ये॒त् । अती॑ति । तत् । रे॒चये॑त् । यत् ।
न । अ॒वद्ये॑दित्य॒व – द्ये॒त् । प॒शोः । आ॒ल॒ब्धस्ये॑त्या-ल॒ब्धस्य॑ । न ।
अवे॑ति । द्ये॒त् । पुर॑स्तात् । नाभ्याः॑ । अ॒न्यत् । अ॒वद्ये॑दित्य॒व – द्ये॒त् ।
उ॒परि॑ष्ठात् । अ॒न्यत् । पुर॑स्तात् । वै । नाभ्यै॑ । 3 (50)

3.4.1.4

प्रा॒ण उ॒परि॑ष्ठाद॒पानो॑ या॒वाने॑व प॒शुस्त॑स्या॒व द्यति॑ वि॒ष्णवे॑ शि॒पिवि॑ष्टाय॑
जुहो॑ति य॒द्वै य॒ज्ञस्या॑ति॒रिच्य॑ते यः प॒शोर्भू॑मा या पु॒ष्टिस्तद्-वि॑ष्णुः

शि॒पि॒वि॒ष्टो॒ ऽति॒रि॒क्त॒ ए॒वा॒ति॒रि॒क्तं॑ द॒धा॒त्य॒ति॒रि॒क्त॒स्य॑ शान्त्या
अ॒ष्टा॒प्रू॒ड्ढि॒र॒ण्यं॑ दक्षि॒णा॒ऽष्टा॒प॒दी॒ ह्ये॒षा॒ ऽऽत्मा॑ न॒वमः॑ प॒शो॒रा॒प्त्या॑
अ॒न्त॒र॒को॒श उ॒ष्णी॒षे॒णा॒ऽऽ*वि॒ष्टि॒तं॑ भव॒त्ये॒वमि॒व हि॑ प॒शु॒रु॒ल्ब॒मि॒व ()
च॒र्म॑व मा॒ऽस॒मि॒वा॒स्थी॒व या॒वा॒ने॒व प॒शु॒स्त॒मा॒प॒त्वा॒ऽव रु॒न्धे॒य॒स्यै॒षा
य॒ज्ञे प्रा॒यश्चि॒त्तिः॑ क्रि॒यत॑ इ॒ष्ट्वा व॒सी॒यान् भव॑ति । 4

3.4.1.4 - Padam

प्रा॒ण इति॑ प्र – अ॒नः । उ॒परि॑ष्टात् । अ॒पा॒न इत्य॑प-अ॒नः । या॒वा॒न् ।
ए॒व । प॒शुः । त॒स्य । अ॒वे॒ति । द्य॒ति । वि॒ष्ण॒वे । शि॒पि॒वि॒ष्टा॒ये॒ति
शि॒पि – वि॒ष्टाय॑ । जु॒हो॒ति । यत् । वै । य॒ज्ञ॒स्य । अ॒ति॒रि॒च्य॑त
इत्य॑ति – रि॒च्य॑ते । यः । प॒शोः । भू॒मा । या । पु॒ष्टिः । तत् । वि॒ष्णुः ।
शि॒पि॒वि॒ष्ट इति॑ शि॒पि – वि॒ष्टः । अ॒ति॒रि॒क्त इत्य॑ति – रि॒क्ते । ए॒व ।
अ॒ति॒रि॒क्त॒मि॒त्य॑ति – रि॒क्तम् । द॒धा॒ति । अ॒ति॒रि॒क्त॒स्ये॒त्य॑ति – रि॒क्त॒स्य ।
शान्त्यै॑ । अ॒ष्टा॒प्रू॒डि॒त्य॑ष्टा – प्रू॒ट् । हि॒र॒ण्य॑म् । दक्षि॒णा ।
अ॒ष्टा॒प॒दी॒त्य॑ष्टा – प॒दी । हि । ए॒षा । आ॒त्मा । न॒वमः॑ । प॒शोः ।
आ॒प्त्यै॑ । अ॒न्त॒र॒को॒श इत्य॑न्तर – को॒शे । उ॒ष्णी॒षे॒ण ।

आ॒वि॒ष्टि॒त॒मि॒त्या – वि॒ष्टि॒त॒म् । भ॒व॒ति॒ । ए॒व॒म् । इ॒व । हि॒ । प॒शुः ।
उ॒ल्ब॒म् । इ॒व () । च॒र्म । इ॒व । मा॒ऽस॒म् । इ॒व । अ॒स्थि॒ । इ॒व ।
या॒वा॒न् । ए॒व । प॒शुः । त॒म् । आ॒प्त्वा । अ॒वे॒ति॒ । रु॒न्धे॒ । य॒स्य॒ । ए॒षा ।
य॒ज्ञे॒ । प्रा॒यश्चि॒त्तिः॑ । क्रि॒यते॑ । इ॒ष्ट्वा । व॒सी॒या॒न् । भ॒व॒ति॒ । 4 (71)

(व॒र्तय॑त्याह॒-न इति॑-वै नाभ्या॑-उ॒ल्ब॒मि॒वै-क॒वि॒ऽश॒तिश्च॑) (A1)

3.4.2.1

आ॒ वा॒यो भू॒ष शु॒चि॒पा उप॑ नः॒ सह॒स्रं॑ ते॒ नियु॑तो॒ विश्व॑वार ।
उपो॑ ते॒ अ॒न्धो म॒द्य॒मया॑मि॒ यस्य॑ दे॒व द॒धिषे॑ पूर्व॒पेयं॑ ।
आ॒कू॒त्यै त्वा॒ कामा॑य त्वा॒ समृ॑धे॒ त्वा कि॒क्कि॒टा ते॒ मनः॑ प्र॒जाप॑तये
स्वाहा॑ कि॒क्कि॒टा ते॒ प्रा॒णं वा॒यवे॑ स्वाहा॑ कि॒क्कि॒टा ते॒ चक्षुः॑ सू॒र्याय॑
स्वाहा॑ कि॒क्कि॒टा ते॒ श्रो॒त्रं द्या॒वापृ॑थि॒वीभ्या॑ स्वाहा॑ कि॒क्कि॒टा ते॒
वाच॑ऽसर॒स्वत्यै॑ स्वाहा॑- [] 5

3.4.2.1 - Padam

ए॒ति॒ । वा॒यो इति॑ । भू॒ष । शु॒चि॒पा इति॑ शु॒चि – पाः॑ । उपे॑ति॒ । नः॑ ।
स॒ह॒स्र॒म् । ते॒ । नि॒यु॒त इति॑ नि – यु॒तः॑ । वि॒श्व॒वा॒रे॒ति॑ वि॒श्व – वा॒र ।

पद पाठे (वाक्य सहित) – तृतीयकाण्डे – चतुर्थः प्रश्नः

उपो॑ इति॑ । ते॒ । अ॒न्धः । म॒द्यम् । अ॒यामि॑ । य॒स्य । दे॒व । द॒धिषे॑ ।
पूर्व॑पे॒यमि॑ति॒ पूर्व – पे॒यम् । आ॒कू॒त्या इ॒त्या-कू॒त्यै । त्वा । का॒माय॑ ।
त्वा । स॒मृ॒ध इति॑ सं – ऋ॒धे । त्वा । कि॒क्कि॒टा । ते॒ । म॒नः ।
प्र॒जाप॑तय॒ इति॑ प्र॒जा – प॒तये॑ । स्वा॒हा । कि॒क्कि॒टा । ते॒ । प्रा॒णमि॑ति॒
प्र – अ॒नम् । वा॒यवे॑ । स्वा॒हा । कि॒क्कि॒टा । ते॒ । चक्षुः॑ । सू॒र्याय॑ ।
स्वा॒हा । कि॒क्कि॒टा । ते॒ । श्रो॒त्रम् । द्या॒वापृ॑थि॒वीभ्या॑मि॒ति
द्या॒वा-पृ॑थि॒वीभ्या॑म् । स्वा॒हा । कि॒क्कि॒टा । ते॒ । वा॒चम् । सर॑स्व॒त्यै ।
स्वा॒हा । 5 (50)

3.4.2.2

त्वं तुरी॑या व॒शिनी॑ व॒शाऽसि॑ स॒कृद्य॑त् त्वा म॒नसा॑ गर्भ॒ आऽश॑यत् ।
व॒शा त्वं व॑शिनी॒ गच्छ॑ दे॒वान्थ-स॒त्याः स॒न्तु य॑ज॒मान॑स्य॒ कामाः॑ ।
अ॒जाऽसि॑ र॒यिष्ठा॑ पृ॒थिव्या॑ꣳ सी॒दोर्ध्वाऽन्त॑रि॒क्षमु॑प॒ तिष्ठ॑स्व दि॒वि ते
बृ॒हद्भाः॑ । त॒न्तुं त॒न्वन् र॑ज॒सो भानु॑मन्वि॒हि ज्योति॑ष्म॒तः प॒थो र॑क्ष
धि॒या कृ॑तान् । अ॒नु॒ल्ब॒णं व॑य॒त जो॑गु॒वाम॑पो म॒नु () भ॑व॒ जन॑या

पद पाठे (वाक्य सहित) – तृतीयकाण्डे – चतुर्थः प्रश्नः

दै॒व्यं॑ ज॒नं॑ । म॒न॒सो॑ ह॒वि॒र॒सि॑ प्र॒जा॒प॒ते॒र्व॒र्णो॑ गा॒त्रा॒णां॑ ते गा॒त्र॒भा॒जो॑
भू॒या॒स्म । 6

3.4.2.2 - Padam

त्वम् । तु॒री॒या॑ । व॒शि॒नी॑ । व॒शा । अ॒सि॒ । स॒कृ॒त् । यत् । त्वा ।
म॒न॒सा । ग॒र्भः॑ । ए॒ति॒ । अ॒श॒य॒त् । व॒शा । त्वम् । व॒शि॒नी॑ । ग॒च्छ॒ ।
दे॒वान् । स॒त्याः॑ । स॒न्तु॒ । य॒ज॒मा॒न॒स्य॑ । का॒माः॑ । अ॒जा । अ॒सि॒ ।
र॒यि॒ष्ठे॒ति॑ र॒यि – स्था॑ । पृ॒थि॒व्याम् । सी॒द॒ । उ॒र्ध्वा । अ॒न्त॒रि॒क्षम् ।
उ॒पे॒ति॑ । ति॒ष्ठ॒स्व॒ । दि॒वि॒ । ते॒ । बृ॒ह॒त् । भाः॑ । त॒न्तु॒म् । त॒न्व॒न् ।
र॒ज॒सः॑ । भा॒नु॒म् । अ॒न्वि॒ति॑ । इ॒हि॒ । ज्यो॒ति॒ष्म॒तः॑ । प॒थः॑ । र॒क्ष॒ ।
धि॒या । कृ॒ता॒न् । अ॒नु॒ल्ब॒णम् । व॒य॒त॒ । जो॒गु॒वा॒म् । अ॒पः॑ । म॒नुः॑ () ।
भ॒व॒ । ज॒न॒य॒ । दै॒व्यम्॑ । ज॒न॒म् । म॒न॒सः॑ । ह॒विः॑ । अ॒सि॒ ।
प्र॒जा॒प॒ते॒रि॒ति॑ प्र॒जा – प॒तेः॑ । व॒र्णः॑ । गा॒त्रा॒णाम् । ते॒ ।
गा॒त्र॒भा॒ज इति॑ गा॒त्र – भा॒जः॑ । भू॒या॒स्म । 6 (63)
(स॒र॒स्व॒त्यै॑ स्वा॒हा – म॒नु – स्त्र॒यो॒द॒श॑ च) (A2)

3.4.3.1

इ॒मे॒ वै स॒हाऽऽ॒स्तां॒ ते वा॒युर्व्य॑वा॒त् ते गर्भ॑म॒दधा॑तां॒ तं सोमः॑
प्रा॒ज॒नय॑-द॒ग्नि॒र॒ग्र॒स॒त स ए॒तं प्र॒जा॒प॒ति॒रा॒ग्ने॒य-म॑ष्टा॒क॒पा॒ल॒म॒प॒श्य॑त् तं
नि॒र॒व॒प॒त् तेनै॑वैनाम॒ग्ने॒र॒धि नि॒र॒क्री॑णात् तस्मा॒द॒प्य॒न्य॒दे॒व॒त्या॒मा॒ल॒भ॒मा॒न
आ॒ग्ने॒य॒म॑ष्टा॒क॒पा॒लं पु॒र॒स्ता॒न्नि॒र्व॒पे॒द॒ग्ने॒रे॒वैना॑म॒धि
नि॒ष्क्री॑याऽऽल॒भ॒ते यद् - [] 7

3.4.3.1 - Padam

इ॒मे इति॑ । वै । स॒ह । आ॒स्ताम् । ते इति॑ । वा॒युः । वीति॑ । अ॒वा॒त् ।
ते इति॑ । गर्भ॑म् । अ॒द॒धा॒ताम् । तम् । सोमः॑ । प्रेति॑ । अ॒ज॒न॒य॒त् ।
अ॒ग्निः । अ॒ग्र॒स॒त । सः । ए॒तम् । प्र॒जा॒प॒ति॒रिति॑ प्र॒जा - प॒तिः ।
आ॒ग्ने॒यम् । अ॒ष्टा॒क॒पा॒ल॒मि॒त्य॒ष्टा - क॒पा॒लम् । अ॒प॒श्य॑त् । तम् ।
नि॒रिति॑ । अ॒व॒प॒त् । तेन॑ । ए॒व । ए॒नाम् । अ॒ग्नेः । अ॒धि । नि॒रिति॑ ।
अ॒क्री॑णात् । तस्मा॑त् । अ॒पीति॑ । अ॒न्य॒दे॒व॒त्या॒मि॒त्य॒न्य - दे॒व॒त्याम् ।
आ॒ल॒भ॒मा॒न इत्या॑ - ल॒भ॒मा॒नः । आ॒ग्ने॒यम् ।
अ॒ष्टा॒क॒पा॒ल॒मि॒त्य॒ष्टा-क॒पा॒लम् । पु॒र॒स्ता॒त् । नि॒रिति॑ । व॒पेत् । अ॒ग्नेः ।

ए॒व । ए॒नाम् । अ॒धी॒ति । नि॒ष्क्री॒येति॑ निः – क्री॒य । ए॒ति । ल॒भ॒ते ।

यत् । 7 (50)

3.4.3.2

वा॒युर्व्य॒वात् तस्मा॑द्-वा॒यव्या॑ यदि॒मे गर्भ॑म॒दधा॑तां तस्मा॑द्-
द्या॒वापृ॑थि॒व्या य॒थ् सोमः॑ प्रा॒जन॒यद॑ग्निर॒ग्रस॑त तस्मा॑द॒ग्नीषो॑मी॒या
य॒दन॒योर्वि॒यत्यो॑र्वा॒गव॑दत् तस्मा॑त् सार॒स्वती॑ यत् प्र॒जाप॑तिर॒ग्नेरधि॑
नि॒रक्री॑णात् तस्मा॑त् प्रा॒जाप॑त्या सा वा ए॒षा सर्व॑दे॒वत्या॑ य॒दजा॑ व॒शा
वा॒यव्या॑मा ल॒भेत॑ भू॒तिकामो॑ वा॒युर्वै क्षे॑पि॒ष्ठा दे॒वता॑ वा॒युमे॒व
स्वेन॑- [] 8

3.4.3.2 - Padam

वा॒युः । व्य॒वादि॑ति वि – अ॒वात् । तस्मा॑त् । वा॒यव्या॑ । यत् ।
इ॒मे इति॑ । गर्भ॑म् । अ॒दधा॑ताम् । तस्मा॑त् । द्या॒वापृ॑थि॒व्येति॑
द्या॒वा – पृ॒थि॒व्या । यत् । सोमः॑ । प्रेति॑ । अ॒जन॒यत् । अ॒ग्निः ।
अ॒ग्रस॑त । तस्मा॑त् । अ॒ग्नीषो॑मी॒येत्य॑ग्नी-सो॒मीया॑ । यत् । अ॒नयोः॑ ।
वि॒यत्यो॑रिति॑ वि – य॒त्योः । वाक् । अ॒वद॑त् । तस्मा॑त् । सार॒स्वती॑ ।

यत् । प्र॒जाप॑तिरिति॒ प्र॒जा – प॒तिः । अ॒ग्नेः । अधी॑ति ।
नि॒र॒क्री॑णादिति॒ निः – अ॒क्री॑णात् । तस्मा॑त् ।
प्रा॒जाप॑त्येति॒ प्रा॒जा – प॒त्या । सा । वै । ए॒षा । स॒र्वदे॑वत्येति॒
स॒र्व – दे॒वत्या॑ । यत् । अ॒जा । व॒शा । वा॒यव्या॑म् । एति॑ । ल॒भेत॑ ।
भू॒तिकाम॑ इति॒ भू॒ति – का॒मः । वा॒युः । वै । क्षे॒पि॑ष्ठा । दे॒वता॑ ।
वा॒युम् । ए॒व । स्वेन॑ । 8 (50)

3.4.3.3

भा॒ग॒धे॒ये॒नो॒प॒ धा॑वति॒ स ए॒वैनं॑ भू॒तिं ग॑मयति॒ द्या॒वापृ॑थि॒व्यामा॑ ल॒भेत॑
कृ॒षमा॑णः प्र॒तिष्ठा॑कामो॒ दि॒व ए॒वास्मै॑ प॒र्जन्यो॑ व॒र्षति॑ व्य॒स्यामो॑ष॒धयो॑
रो॒हन्ति॑ स॒मर्धु॑क॒मस्य॑ स॒स्यं भ॑वत्य॒ग्नीषो॑मी॒यामा॑ ल॒भेत॑ यः
का॒मये॑तान्न॒वानन्ना॑दः स्या॒मित्य॑ग्नि॒नैवा॑न्न॒मव॑ रुन्धे
सो॒मे॒ना॒न्नाद्य॑-म॒न्नवा॑ने॒वान्ना॑दो भ॒वति॑ सा॒रस्व॑ती॒मा ल॒भेत॑ य – [] 9

3.4.3.3 - Padam

भा॒ग॒धे॒ये॒नेति॑ भा॒ग – धे॒येन॑ । उ॒पेति॑ । धा॒वति॑ । सः । ए॒व । ए॒नम् ।
भू॒तिम् । ग॑मयति॒ । द्या॒वापृ॑थि॒व्यामि॑ति॒ द्या॒वा – पृ॑थि॒व्याम् । एति॑ ।

ल॒भेत॑ । कृ॒षमा॑णः । प्र॒तिष्ठा॑काम॒ इति॑ प्र॒तिष्ठा॑-कामः । दि॒वः । ए॒व ।
 अ॒स्मै । प॒र्जन्यः॑ । व॒र्षति॑ । वी॒ति । अ॒स्याम् । ओष॑धयः । रो॒हन्ति॑ ।
 स॒मर्धु॑कमि॒ति सं - अ॒र्धुक॑म् । अ॒स्य । स॒स्यम् । भ॒वति॑ ।
 अ॒ग्नी॒षोमी॑यामि॒त्यग्नी॑-सोमी॒याम् । ए॒ति । ल॒भेत॑ । यः । का॒मये॑त ।
 अ॒न्नवा॑न्नित्य॒न्न - वा॒न् । अ॒न्नाद॑ इत्य॒न्न - अ॒दः । स्या॑म् ।
 इ॒ति । अ॒ग्निना॑ ॥ ए॒व । अ॒न्नम् । अ॒वेति॑ । रु॒न्धे । सो॒मेन॑ ।
 अ॒न्नाद्य॑मित्य॒न्न - अ॒द्यम् । अ॒न्नवा॑न्नित्य॒न्न - वा॒न् । ए॒व ।
 अ॒न्नाद॑ इत्य॒न्न - अ॒दः । भ॒वति॑ । सा॒रस्व॑तीम् । ए॒ति । ल॒भेत॑ ।

यः । 9 (50)

3.4.3.4

ई॒श्वरो॑ वा॒चो व॑दि॒तोः स॒न् वा॒चं न॑वदेद्-वा॒ग्वै स॒रस्व॑ती स॒रस्व॑तीमे॒व
 स्वे॒न भा॒गधे॑ये॒नोप॑ धा॒वति॑ सै॒वास्मि॑न् वा॒चं द॑धाति प्रा॒जाप॑त्यामा
 ल॒भेत॑ यः का॒मये॑तान॒भिजि॑तम॒भि ज॑येयमि॒ति प्र॒जाप॑तिः सर्वा॑ दे॒वता॑
 दे॒वता॑भिरे॒वा-न॑भिजि॒तम॒भि ज॑यति वा॒यव्य॑योपा॒करो॑ति
 वा॒योरे॒वैना॑मव॒रुध्या॑ऽऽ*ल॒भत॑ आ॒कूत्यै॑ त्वा॒ कामा॑य॒ त्वे - [] 10

3.4.3.4 - Padam

ई॒श्वरः॑ । वा॒चः॑ । वदि॑तोः । सन् । वाच॑म् । न । वदे॑त् । वाक् । वै ।
सर॑स्वती । सर॑स्वतीम् । ए॒व । स्वेन॑ । भा॒ग॒धे॒ये॒नेति॑ भा॒ग – धे॒येन॑ ।
उ॒पेति॑ । धा॒वति॑ । सा । ए॒व । अ॒स्मिन् । वाच॑म् । द॒धाति॑ ।
प्रा॒जाप॑त्यामिति प्रा॒जा – प॒त्याम् । एति॑ । ल॒भेत॑ । यः । का॒मये॑त ।
अ॒न॒भि॒जित॑मित्य॒न॒भि – जित॑म् । अ॒भीति॑ । ज॒येय॑म् । इति॑ ।
प्रा॒जाप॑तिरिति प्रा॒जा – प॒तिः । सर्वाः॑ । दे॒वताः॑ । दे॒वता॑भिः । ए॒व ।
अ॒न॒भि॒जित॑मित्य॒न॒भि – जित॑म् । अ॒भीति॑ । ज॒यति॑ । वा॒यव्य॑या ।
उ॒पाक॑रोती॒युप – आ॑करोति । वा॒योः । ए॒व । ए॒नाम् ।
अ॒व॒रु॒ध्येत्य॑व – रु॒ध्य । एति॑ । ल॒भते॑ । आ॒कू॒त्या इत्या॑ – कू॒त्यै ।
त्वा । का॒माय॑ । त्वा । 10 (50)

3.4.3.5

त्या॒ह यथा॑य॒जुरे॒वैतत्॑ कि॒क्कि॒टाका॑रं जु॒होति॑ कि॒क्कि॒टाका॑रेण वै ग्रा॒म्याः
प॒शवो॑ रम॒न्ते प्रा॒ऽऽ*र॒ण्याः प॑तन्ति यत् कि॒क्कि॒टाका॑रं जु॒होति॑
ग्रा॒म्याणां॑ प॒शूनां॑ धृ॒त्यै प॑र्य॒ग्नौ क्रि॑यमाणे जु॒होति॑ जी॒वन्ती॑मे॒वैना॑ ॐ

सु॒व॒र्गं॑ लो॒कं॑ ग॒म॒य॒ति॑ त्वं तु॒री॒या व॒शिनी॑ व॒शाऽसी॒त्याह॑ दे॒व॒त्रै॒वैनां॑
ग॒म॒य॒ति॑ स॒त्याः स॒न्तु॑ य॒ज॒मा॒नस्य॑ का॒मा इ॒त्याहै॒ष वै का॒मो –[] 11

3.4.3.5 - Padam

इति॑ । आ॒ह । य॒था॒य॒जु॒रिति॑ य॒था – य॒जुः । ए॒व । ए॒तत् ।
कि॒क्कि॒टा॒का॒र॒मिति॑ कि॒क्कि॒टा – का॒रम् । जु॒होति॑ । कि॒क्कि॒टा॒का॒रेणेति॑
कि॒क्कि॒टा – का॒रेण॑ । वै । ग्रा॒म्याः । प॒श॒वः । र॒म॒न्ते । प्रेति॑ ।
आ॒र॒ण्याः । प॒त॒न्ति॑ । यत् । कि॒क्कि॒टा॒का॒र॒मिति॑ कि॒क्कि॒टा – का॒रम् ।
जु॒होति॑ । ग्रा॒म्याणा॑म् । प॒शूना॑म् । धृ॒त्यै॑ । प॒र्य॒ग्ना॒विति॑ परि॒-अ॒ग्नौ ।
क्रि॒य॒मा॒णे । जु॒होति॑ । जी॒व॒न्ती॑म् । ए॒व । ए॒नाम् । सु॒व॒र्ग॒मिति॑
सु॒वः – ग॒म् । लो॒कम् । ग॒म॒य॒ति॑ । त्वम् । तु॒री॒या॑ । व॒शिनी॑ । व॒शा ।
अ॒सि॒ । इति॑ । आ॒ह । दे॒व॒त्रेति॑ दे॒व – त्रा॑ । ए॒व । ए॒नाम् । ग॒म॒य॒ति॑ ।
स॒त्याः । स॒न्तु॑ । य॒ज॒मा॒नस्य॑ । का॒माः । इति॑ । आ॒ह । ए॒षः । वै ।
का॒मः । 11 (50)

3.4.3.6

यज॑मानस्य॑ यद॑नार्त॑ उ॒दृ॒चं गच्छ॑ति तस्मा॑दे॒वमा॑हाऽजा॑सि रयि॑ष्ठेत्या॑है
ष्वे॒वैनां॑ लो॒केषु॑ प्रति॑ष्ठापयति दि॒वि ते बृ॒हद्वा इत्या॑ह सु॒वर्ग ए॒वास्मै॑
लो॒के ज्योति॑र् दधाति तन्तुं॑ तन्वन् रज॑सो भानु॑मन्विहीत्या॑हे॒माने॒वास्मै॑
लो॒कान् ज्योति॑ष्मतः करोत्यनु॒ल्बणं॑ व॒यत॑ जोगु॑वामप इत्या॑- [] 12

3.4.3.6 - Padam

यज॑मानस्य । यत् । अ॒नार्त॑ । उ॒दृ॒चमि॑त्युत् – ऋच॑म् । गच्छ॑ति ।
तस्मा॑त् । ए॒वम् । आ॒ह । अ॒जा । अ॒सि । रयि॑ष्ठेति रयि – स्था ।
इति॑ । आ॒ह । ए॒षु । ए॒व । ए॒नाम् । लो॒केषु॑ । प्रतीति॑ । स्थाप॑यति ।
दि॒वि । ते । बृ॒हत् । भाः । इति॑ । आ॒ह । सु॒वर्ग इति॑ सुवः – गे ।
ए॒व । अ॒स्मै । लो॒के । ज्योतिः॑ । दधा॑ति । तन्तु॑म् । तन्वन् ।
रज॑सः । भानु॑म् । अन्वि॑ति । इ॒हि । इति॑ । आ॒ह । इ॒मान् । ए॒व ।
अ॒स्मै । लो॒कान् । ज्योति॑ष्मतः । करो॑ति । अनु॒ल्बण॑म् । व॒यत॑ ।
जोगु॑वाम् । अपः॑ । इति॑ । 12 (50)

3.4.3.7

–ह॒ यदे॒व य॒ज्ञ उ॒ल्ब॑णं॒ क्रि॒यते॑ तस्यै॒वैषा॑ शान्ति॒र्मनु॑र्भव
जन॒या दै॒व्यं॑ जन॒मित्या॑ह॒ मान॒व्यो वै॑ प्र॒जास्ता॑ ए॒वाऽऽ*द्याः॑ कुरु॒ते
मन॒सो ह॒विर॒सीत्या॑ह॒ स्वगा॑कृत्यै॒ गात्रा॑णां॒ ते गा॒त्रभा॑जो
भूया॑स्मेत्या॒हाऽऽ*शि॒षमे॒वैता॑मा॒ शास्ते॑ तस्यै॒ वा ए॒तस्या॑
ए॒कमे॒वा–दे॒वय॑जनं॒ य॒दाल॑ब्धायाम॒भ्रो – [] 13

3.4.3.7 - Padam

आ॒ह । यत् । ए॒व । य॒ज्ञे । उ॒ल्ब॑णम् । क्रि॒यते॑ । तस्य॑ । ए॒व । ए॒षा ।
शान्तिः॑ । मनुः॑ । भ॒व । ज॒नय॑ । दै॒व्यम् । ज॒नम् । इति॑ । आ॒ह ।
मा॒नव्यः॑ । वै । प्र॒जा इति॑ प्र – जाः । ताः । ए॒व । आ॒द्याः॑ । कु॒रुते॑ ।
मन॒सः । ह॒विः । अ॒सि । इति॑ । आ॒ह । स्व॒गाकृ॑त्या इति॑
स्व॒गा – कृ॒त्यै । गा॒त्राणाम् । ते । गा॒त्रभा॑ज इति॑ गा॒त्र – भा॑जः ।
भूया॑स्म । इति॑ । आ॒ह । आ॒शि॒षमि॒त्या – शि॒षम् । ए॒व । ए॒ताम् ।
एति॑ । शा॒स्ते । तस्यै॑ । वै । ए॒तस्याः॑ । ए॒कम् । ए॒व ।

अदे॒वय॒जन॒मित्य॑दे॒व – य॒जन॒म् । यत् ।

आल॑ब्धा॒यामि॒त्या – ल॒ब्धा॒याम् । अ॒भ्रः । 13 (50)

3.4.3.8

भव॑ति॒ यदा॑ल॒ब्धा॒याम॑भ्रः॒ स्याद॑प्सु॒ वा॑प्र॒वेश॑ये॒त् सर्वा॑ँ वा॒
प्रा॒श्जी॒याद्य॑दप्सु॒ प्र॒वेश॑ये॒द्यज्ञ॑वेश॒सं कुर्या॑त् सर्वा॑मे॒व
प्रा॒श्जी॒यादि॑न्द्रि॒यमे॒वाऽऽत्म॑न् धत् ते सा वा ए॒ष त्र॑या॒णामे॒वाव॑ रु॒द्धा
सँव॑त्सर॒सदः॑ सह॒स्रया॑जिनो॒ गृह॑मे॒धिन॑स्त ए॒वैत॑या
यजे॑रन् तेषा॑मे॒वैषा॑ऽऽप्ता । 14

3.4.3.8 - Padam

भव॑ति । यत् । आल॑ब्धा॒यामि॒त्या – ल॒ब्धा॒याम् । अ॒भ्रः । स्यात् ।
अ॒प्स्वि॒त्यप्-सु॑ । वा । प्र॒वेश॑ये॒दिति॑ प्र – वे॒शये॑त् । सर्वा॑म् । वा ।
प्रेति॑ । अ॒श्नी॒यात् । यत् । अ॒प्स्वि॒त्यप् – सु॑ । प्र॒वेश॑ये॒दिति॑
प्र – वे॒शये॑त् । य॒ज्ञवे॒शस॑मि॒ति य॒ज्ञ – वे॒शस॑म् । कुर्या॑त् । सर्वा॑म् ।
ए॒व । प्रेति॑ । अ॒श्नी॒यात् । इ॒न्द्रि॒यम् । ए॒व । आ॒त्मन् । ध॒त्ते । सा ।
वै । ए॒षा । त्र॑या॒णाम् । ए॒व । अ॒वरु॑द्धे॒त्यव॑ – रु॒द्धा ।

सँव॑थ्स॒रस॒द इति॑ सँव॑थ्स॒र – स॒दः । स॒हस्र॑याजि॒न इति॑
स॒हस्र॑ – याजि॑नः । गृ॒हमे॑धि॒न इति॑ गृ॒ह – मे॑धि॒नः । ते । ए॒व ।
ए॒तया॑ । यजे॑रन् । तेषा॑म् । ए॒व । ए॒षा । आ॒प्ता । 14 (42)

(यथ् – स्वेन – सारस्वतीमा लभेत यः – कामाय त्वा – कामो –
ऽप इत्य – भ्रो – द्विचत्वारिंशच्च) (A3)

3.4.4.1

चि॒त्तं च॑ चि॒त्तिश्चा॑ ऽऽ*कू॒तं चा॑ऽऽ*कू॒तिश्च॑ वि॒ज्ञातं॑ च॒ वि॒ज्ञानं॑ च॒
म॒नश्च॑ श॒क्वरी॑श्च॒ दर्श॑श्च॒ पूर्ण॑मा॒सश्च॑ बृ॒हच्च॑ रथ॒न्तरं॑ च॒
प्र॒जाप॑ति॒र्जया॑निन्द्रा॒य वृ॑ष्णे प्रा॒यच्छ॑दु॒ग्रः पृ॑त॒नाज्ये॑षु तस्मै॒ विशः॑
स॒मन॑मन्त॒ सर्वाः॑ स॒ उग्रः॑ स॒हि ह॑व्यो ब॒भूव॑दे॒वासुराः॑ सँय॑त्ता
आ॒सन्थ्स॑ इन्द्रः॒ प्र॒जाप॑तिमु॒पा () धा॑वत् तस्मा॒ एता॑ञ्ज॒यान्
प्रा॒यच्छ॑त् ता॒नजु॑होत् ततो॒ वै दे॒वा अ॑सु॒रान॑ज॒यन् यद॑ज॒यन् तज्ज॑यानां
ज॒यत्व॑ ऽ स्पर्ध॑माने॒नैते॑ हो॒तव्या॑ ज॒यत्ये॒व तां॑ पृ॒तनां॑ । 15

3.4.4.1 - Padam

चित्तम् । च । चित्तिः । च । आकू॑तमित्या – कू॒तम् । च ।
आकू॑तिरित्या – कू॒तिः । च । वि॒ज्ञा॑तमिति वि – ज्ञा॒तम् । च ।
वि॒ज्ञा॑नमिति वि-ज्ञानम् । च । मनः । च । शक्व॑रीः । च । दर्शः ।
च । पूर्ण॑मास इति पूर्ण – मासः । च । बृ॒हत् । च । रथ॑न्तरमिति
रथं – त॒रम् । च । प्र॒जा॑पतिरिति प्र॒जा – प॒तिः । जया॑न् । इन्द्रा॑य ।
वृ॒ष्णै॑ । प्रेति॑ । अ॒यच्छ॑त् । उ॒ग्रः । पृ॒त॒ना॒ज्येषु॑ । तस्मै॑ । वि॒शः ।
समि॑ति । अ॒न॒म॒न्त॒ । सर्वाः॑ । सः । उ॒ग्रः । सः । हि । ह॒व्यः ।
ब॒भूव॑ । दे॒वा॒सु॒रा इति॑ देव – अ॒सु॒राः । सँय॑त्ता इति सं – य॒त्ताः ।
आ॒स॒न् । सः । इन्द्रः॑ । प्र॒जा॑पतिमिति प्र॒जा – प॒तिम् । उपेति॑ () ।
अ॒धा॒वत् । तस्मै॑ । ए॒ता॒न् । जया॑न् । प्रेति॑ । अ॒यच्छ॑त् । ता॒न् ।
अ॒जु॒होत् । ततः॑ । वै । दे॒वाः । अ॒सु॒रान् । अ॒ज॒य॒न् । यत् ।
अ॒ज॒य॒न् । तत् । जया॑नाम् । ज॒य॒त्वमि॑ति जय – त्वम् । स्पर्ध॑मानेन ।
ए॒ते । हो॒त॒व्याः॑ । जय॑ति । ए॒व । ता॒म् । पृ॒त॒ना॒म् । 15 (75)

(उप – पञ्चविंशतिश्च) (A4)

3.4.5.1

अ॒ग्नि॒भू॒ता॒ना॒मधि॑पतिः॒ समा॑ऽव॒त्विन्द्रो॑ ज्ये॒ष्ठानां॑ य॒मः पृ॒थि॒व्या
वा॒यु॒रन्त॑रि॒क्षस्य॑ सू॒र्यो॒ दि॒वश्च॑न्द्र॒मा नक्ष॑त्राणां बृ॒हस्प॑तिर्ब्र॒ह्म॒णो
मि॒त्रः स॒त्यानां॑ व॒रु॒णोऽपा॑ꣳ स॒मु॒द्रः स्रो॒त्याना॑म॒न्नꣳ
सा॒म्राज्या॑ना॒मधि॑पति॒ तन्मा॑ऽव॒तु सोम॑ ओष॒धीना॑ꣳ स॒विता॑ प्र॒स॒वाना॑ꣳ
रु॒द्रः प॑शूनां त्व॒ष्टा रू॒पाणां॑ वि॒ष्णुः पर्व॑तानां म॒रुतो॑
ग॒णा॒ना॒मधि॑प॒तय॑स्ते मा॒वन्तु॑ पि॒तरः॑ पि॒ताम॑हाः प॒रेऽव॑रे ()
त॒तास्त॑तामहा इ॒ह मा॑ऽव॒त । अ॒स्मिन् ब्र॑ह्म॒न्नस्मिन्॑ क्ष॒त्रेऽस्या॑-
मा॒शिष्य॑स्यां पु॒रोधा॑याम॒स्मिन्-कर्म॑न्नस्यां दे॒वहू॑त्यां । 16

3.4.5.1 - Padam

अ॒ग्निः । भू॒ता॒ना॒म् । अधि॑पतिरि॒त्यधि॑- पतिः । सः । मा । अ॒व॒तु ।
इन्द्रः । ज्ये॒ष्ठाना॑म् । य॒मः । पृ॒थि॒व्याः । वा॒युः । अन्त॑रि॒क्षस्य॑ ।
सू॒र्यः । दि॒वः । च॒न्द्र॒माः । नक्ष॑त्राणा॒म् । बृ॒हस्प॑तिः । ब्र॒ह्म॒णः ।
मि॒त्रः । स॒त्याना॑म् । व॒रु॒णः । अ॒पाम् । स॒मु॒द्रः । स्रो॒त्याना॑म् ।
अ॒न्नम् । सा॒म्राज्या॑ना॒मिति॑ सां - रा॒ज्या॒ना॒म् । अधि॑प॒तीत्यधि॑-पति ।

तत् । मा । अवतु । सोमः । ओषधीनाम् । सविता । प्रसवानामिति
 प्र – सवानाम् । रुद्रः । पशूनाम् । त्वष्टा । रूपाणाम् । विष्णुः ।
 पर्वतानाम् । मरुतः । गणानाम् । अधिपतय इत्यधि – पतयः । ते ।
 मा । अवन्तु । पितरः । पितामहाः । परे । अवरे () । तताः ।
 ततामहाः । इह । मा । अवत । अस्मिन् । ब्रह्मन् । अस्मिन् ।
 क्षत्रे । अस्याम् । आशिषीत्या – शिषि । अस्याम् ।
 पुरोधायामिति पुरः – धायाम् । अस्मिन् । कर्मन् । अस्याम् ।
 देवहूत्यामिति देव – हूत्याम् । 16 (67)

(अवरे – सप्तदश च) (A5)

3.4.6.1

देवा वै यद्यज्ञेऽकुर्वत तदसुरा अकुर्वत ते देवा
 एतानभ्यातानानपश्यन् – तानभ्यातन्वत यद्देवानां कर्माऽऽसीदार्थ्यत
 तद्यदसुराणां न तदार्थ्यत येन कर्मणेश्चेत् तत्र होतव्या ऋध्नोत्येव
 तेन कर्मणा यद्विश्वे देवाः समभरन् तस्मादभ्याताना वैश्वदेवायत् –
 प्रजापतिर्जयान् प्रायच्छत् तस्माज्जयाः प्राजापत्या – [] 17

3.4.6.1 - Padam

दे॒वाः । वै । यत् । य॒ज्ञे । अ॒कुर्व॑त । तत् । अ॒सुराः । अ॒कुर्व॑त । ते ।
दे॒वाः । ए॒तान् । अ॒भ्याता॑नानित्य॒भि – आ॒तानान् । अ॒पश्य॑न् ।
तान् । अ॒भ्यात॑न्वतेत्य॒भि – आ॒तन्व॑त । यत् । दे॒वाना॑म् । क॒र्म ।
आसी॑त् । आ॒र्ध्य॑त । तत् । यत् । अ॒सुरा॑णाम् । न । तत् । आ॒र्ध्य॑त ।
येन॑ । क॒र्मणा॑ । ई॒र्त्से॑त् । तत्र॑ । हो॒तव्याः॑ । ऋ॒ध्नोति॑ । ए॒व । तेन॑ ।
क॒र्मणा॑ । यत् । वि॒श्वे॑ । दे॒वाः । स॒मभ॑रन्निति॒ सं – अ॒भर॑न् ।
तस्मा॑त् । अ॒भ्याता॑ना इत्य॒भि – आ॒तानाः॑ । वै॒श्वदे॒वा इति॑
वै॒श्व – दे॒वाः । यत् । प्र॒जाप॑तिरिति॒ प्र॒जा – प॒तिः । ज॒यान् ।
प्रेति॑ । अ॒यच्छ॑त् । तस्मा॑त् । ज॒याः ।

प्रा॒जाप॑त्या इति॒ प्रा॒जा-प॑त्याः । 17 (50)

3.4.6.2

यद्-रा॒ष्ट्रभृ॑द्भी॒ राष्ट्र॑माऽद॒दत् तद्-रा॒ष्ट्रभृ॑ता॒ राष्ट्र॑भृ॒त्त्वं ते दे॒वा
अ॒भ्याता॑नैर॒सुरान॑भ्यातन्व॒त ज॒यैर॑ज॒यन्-रा॒ष्ट्रभृ॑द्भी॒ राष्ट्र॑माऽद॒दत्
यद्दे॒वा अ॒भ्याता॑नैर॒सुरान॑भ्यातन्व॒त तद्भ्या॑तानाना॒मभ्या॑तान॒त्वं

य॒ज्जयै॑रज॒यन् तज्ज॑यानां ज॒यत्वं य॒द्-रा॒ष्ट्रभृ॑द्भी रा॒ष्ट्रमा॑द॒दत्
तद्-रा॒ष्ट्रभृ॑तां रा॒ष्ट्रभृ॑त्त्वं ततो॑ दे॒वा अ॒भवन् परा॑ऽसुरा यो
भ्रातृ॑व्यवा॒न्थ स्या॑त् स () ए॒तान् जुहु॑यादभ्या॒तानै॑रेव
भ्रातृ॑व्या॒नभ्या॑तनु॒ते जयै॑र्जयति रा॒ष्ट्रभृ॑द्भी रा॒ष्ट्रमा॑ द॒त्ते भव॑त्यात्म॒ना
परा॑ऽस्य भ्रातृ॑व्यो भवति । 18

3.4.6.2 - Padam

यत् । रा॒ष्ट्रभृ॑द्भिरिति रा॒ष्ट्रभृ॑त् - भिः । रा॒ष्ट्रम् । एति॑ । अ॒द॒दत् । तत् ।
रा॒ष्ट्रभृ॑तामिति रा॒ष्ट्र - भृ॑ताम् । रा॒ष्ट्रभृ॑त्त्वमिति रा॒ष्ट्रभृ॑त् - त्वम् । ते ।
दे॒वाः । अ॒भ्या॒तानै॑रित्यभि - आ॒तानैः॑ । अ॒सुरान् ।
अ॒भ्या॒तन्व॑तेत्यभि - आ॒तन्व॑त् । जयैः॑ । अ॒ज॒यन् । रा॒ष्ट्रभृ॑द्भिरिति
रा॒ष्ट्रभृ॑त् - भिः । रा॒ष्ट्रम् । एति॑ । अ॒द॒दत् । यत् । दे॒वाः ।
अ॒भ्या॒तानै॑रित्यभि - आ॒तानैः॑ । अ॒सुरान् ।
अ॒भ्या॒तन्व॑तेत्यभि - आ॒तन्व॑त् । तत् ।
अ॒भ्या॒ताना॑नामित्यभि - आ॒ताना॑नाम् ।
अ॒भ्या॒तान॑त्वमित्य॒भ्या॒तान - त्वम् । यत् । जयैः॑ । अ॒ज॒यन् । तत् ।

ज॒याना॑म् । ज॒य॒त्वमि॑ति जय – त्वम् । यत् । रा॒ष्ट्रभृ॑द्भिरि॒ति
 रा॒ष्ट्रभृ॑त् – भिः । रा॒ष्ट्रम् । ए॒ति । अ॒द॒द॒त् । तत् । रा॒ष्ट्रभृ॑तामि॒ति
 रा॒ष्ट्र – भृ॑ताम् । रा॒ष्ट्रभृ॑त्वमि॒ति रा॒ष्ट्रभृ॑त् – त्वम् । ततः॑ । दे॒वाः ।
 अ॒भव॑न् । प॒रेति॑ । अ॒सु॒राः । यः । भ्रा॑तृ॒व्यवा॑नि॒ति भ्रा॑तृ॒व्य – वा॒न् ।
 स्या॑त् । सः () । ए॒तान् । जु॒हु॒यात् । अ॒भ्या॒ता॒नैरि॒त्यभि॑-आ॒ता॒नैः ।
 ए॒व । भ्रा॑तृ॒व्यान् । अ॒भ्या॒त॒नु॒त इ॒त्यभि॑ – आ॒त॒नु॒ते । ज॒यैः । ज॒य॒ति ।
 रा॒ष्ट्रभृ॑द्भिरि॒ति रा॒ष्ट्रभृ॑त् – भिः । रा॒ष्ट्रम् । ए॒ति । द॒त्ते । भ॒व॒ति ।
 आ॒त्म॒ना । प॒रेति॑ । अ॒स्य । भ्रा॑तृ॒व्यः । भ॒व॒ति । 18 (68)
 (प्रा॒जा॒प॒त्याः – सो॒ऽ – षा द॑श च) (A6)

3.4.7.1

ऋ॒ता॒षा॒ड् ऋ॒त॒धा॒मा॒ग्नि॑-ग॒न्धर्व॑स्त-स्यौष॑धयोऽप्सर॑स ऊ॒र्जो॒ नाम॑
 स इ॒दं ब्र॑ह्म क्ष॒त्रं पा॑तु ता इ॒दं ब्र॑ह्म क्ष॒त्रं पा॑न्तु तस्मै॑ स्वा॒हा ता॒भ्यः
 स्वा॒हा स॒ं॒हि॒तो वि॒श्वसा॑मा सूर्यो॑ ग॒न्धर्व॑-स्तस्य मरी॑चयोऽप्सर॑स
 आ॒यु॒वः सु॒षु॒म्नः सूर्य॑ रश्मि-श्च॒न्द्र॒मा ग॒न्धर्व॑-स्तस्य नक्ष॑त्राण्य-

ॐ॒ ष॒स॒र॒सो॒ बे॒कुर॒यो॒भु॒ज्युः॒ सु॒पर्णो॒ य॒ज्ञो॒ ग॒न्धर्व॒-स्त॒स्य॒ दक्षि॒णा
अ॒प्स॒र॒स॒ स्त॒वाः॒ प्र॒जा॒प॒ति॒-वि॒श्व॒क॒र्मा॒ मनो॒ - [] 19

3.4.7.1 - Padam

ऋ॒ता॒षा॒ट् । ऋ॒त॒धा॒मे॒त्यु॒त - धा॒मा । अ॒ग्निः । ग॒न्धर्वः॑ । त॒स्य॑ ।
ओ॒ष॒ध॒यः । अ॒प्स॒र॒सः॑ । ऊ॒र्जः॑ । ना॒म । सः । इ॒दम् । ब्र॒ह्म ।
क्ष॒त्रम् । पा॒तु । ताः । इ॒दम् । ब्र॒ह्म । क्ष॒त्रम् । पा॒न्तु । तस्मै॑ ॥ स्वाहा॑ ॥
ताभ्यः॑ । स्वाहा॑ ॥ स॒-॒हित॑ इति सं - हि॒तः । वि॒श्व॒सा॒मेति॑
वि॒श्व - सा॒मा । सू॒र्यः॑ । ग॒न्धर्वः॑ । त॒स्य॑ । म॒रीच॒यः । अ॒प्स॒र॒सः॑ ।
आ॒यु॒व इ॒त्या - यु॒वः । सु॒षु॒म्न इति॑ सु - सु॒म्नः । सू॒र्य॒र॒श्मि॒रिति॑
सू॒र्य-र॒श्मिः । च॒न्द्र॒माः॑ । ग॒न्धर्वः॑ । त॒स्य॑ । नक्ष॒त्राणि॑ । अ॒प्स॒र॒सः॑ ।
बे॒कुर॒यः । भु॒ज्युः । सु॒पर्ण॑ इति सु - पर्णः॑ । य॒ज्ञः । ग॒न्धर्वः॑ ।
त॒स्य॑ । दक्षि॒णाः । अ॒प्स॒र॒सः॑ । स्त॒वाः । प्र॒जा॒प॒ति॒रिति॑ प्र॒जा-प॒तिः ।
वि॒श्व॒क॒र्मेति॑ वि॒श्व - क॒र्मा । मनः॑ । 19 (50)

3.4.7.2

गन्धर्वस्तस्य॑र्ख् सामान्य॑-फ्सरसो॑ वह्नय॑इषिरो॑ विश्वव्य॑चा वातो॑
गन्धर्व-स्तस्याऽऽ*पो॑ ऽफ्सरसो॑ मुदा॑भुवनस्य॑ पते॑ यस्य॑ते उपरि॑ गृहा॑
इह॑ च । स॑ नो॑ रास्वाज्यानि॑ꣳ रायस्पोष॑ꣳ सुवीर्य॑ꣳ संवँ॑त्सरीणाꣳ
स्वस्तिं॑ । परमे॑ष्ठ्यधिपति॑-मृत्यु॑र् गन्धर्व-स्तस्य॑ विश्वम॑फ्सरसो॑ भुवः॑
सुक्षि॑थिः- सुभू॑ति-भद्र॑कृत् सुव॑र्वान् पर्जन्यो॑ गन्धर्व-स्तस्य॑ विद्यु॑तो॑
ऽफ्सरसो॑ रुचो॑ दूरे॑ हेतिर॑-मृडयो॑ - [] 20

3.4.7.2 - Padam

गन्धर्वः॑ । तस्य॑ । ऋ॒ख्सा॒मानी॑त्यृक्-सा॒मानि॑ । अ॒फ्सर॑सः । वह्नयः॑ ।
इषि॑रः । विश्व॑व्यचा इति॑ विश्व - व्यचाः॑ । वातः॑ । गन्धर्वः॑ । तस्य॑ ।
आपः॑ । अ॒फ्सर॑सः । मुदाः॑ । भुवनस्य॑ । पते॑ । यस्य॑ । ते॑ । उपरि॑ ।
गृहाः॑ । इह॑ । च॑ । सः॑ । नः॑ । रास्व॑ । आ॒ज्यानि॑म् । रायः॑ । पोष॑म् ।
सु॒वीर्य॑मिति॑ सु - वीर्य॑म् । सँ॒वत्स॑रीणामिति॑ सं - वत्स॑रीणाम् ।
स्वस्ति॑म् । परमे॑ष्ठी । अधि॑पतिरित्यधि - पतिः॑ । मृत्युः॑ । गन्धर्वः॑ ।
तस्य॑ । विश्व॑म् । अ॒फ्सर॑सः । भुवः॑ । सु॒क्षिति॑रिति॑ सु - क्षितिः॑ ।

सु॒भू॒ति॒रि॒ति॒ सु॒ – भू॒तिः॑ । भ॒द्र॒कृ॒दि॒ति॒ भ॒द्र॒ – कृ॒त् । सु॒व॒र्वानि॒ति॒
सु॒वः॑ – वा॒न् । प॒र्जन्यः॑ । ग॒न्धर्वः॑ । तस्य॑ । वि॒द्यु॒त इति॑ वि॒-द्यु॒तः॑ ।
अ॒प्सर॒सः॑ । रुचः॑ । दू॒रेहे॒ति॒रि॒ति॒ दू॒रे – हे॒तिः॑ । अ॒मृ॒डयः॑ । 20 (50)

3.4.7.3

मृ॒त्युर्ग॒न्धर्व॑-स्तस्य॑ प्र॒जा अ॒प्सर॒सो भी॒रुवः॑ चारुः॑ कृ॒पण॑ का॒शी
का॒मो ग॒न्धर्व॑-स्तस्या॒धयो॑ ऽप्सर॒सः शो॒चय॑न्ती॒र्नाम॑ स इ॒दं ब्र॒ह्म
क्ष॒त्रं पा॒तु ता॒ इदं॑ ब्र॒ह्म क्ष॒त्रं पा॑न्तु तस्मै॑ स्वाहा॒ ताभ्यः॑ स्वाहा॒ स नो॑
भु॒वन॒स्य प॒ते यस्य॑त॒ उप॒रि गृ॒हा इ॒ह च॑ । उ॒रु ब्र॒ह्मणे॑ऽस्मै॒ क्ष॒त्राय॑
महि॑ श॒र्म यच्छ॑ । 21

3.4.7.3 - Padam

मृ॒त्युः । ग॒न्धर्वः॑ । तस्य॑ । प्र॒जा इति॑ प्र – जाः । अ॒प्सर॒सः ।
भी॒रुवः॑ । चारुः॑ । कृ॒पण॑का॒शीति॑ कृ॒पण॑-का॒शी । का॒मः । ग॒न्धर्वः॑ ।
तस्य॑ । आ॒धय॑ इत्या – धयः॑ । अ॒प्सर॒सः । शो॒चय॑न्तीः । ना॒म ।
सः । इ॒दम् । ब्र॒ह्म । क्ष॒त्रम् । पा॒तु । ताः । इ॒दम् । ब्र॒ह्म । क्ष॒त्रम् ।
पा॑न्तु । तस्मै॑ । स्वाहा॑ । ताभ्यः॑ । स्वाहा॑ । सः । नः॑ । भु॒वन॒स्य ।

प॒ते । य॒स्य । ते । उ॒परि॑ । गृ॒हाः । इ॒ह । च । उ॒रु । ब्र॒ह्म॒णे । अ॒स्मै ।
क्ष॒त्राय॑ । म॒हि । श॒र्म । य॒च्छ । 21 (46)

(म॒नो – ऽमृ॒डयः॑ – षट्च॒त्वारि॑ंशच्च) (A7)

3.4.8.1

रा॒ष्ट्र॒का॒माय॑ हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रेणै॒वास्मै॑ रा॒ष्ट्रम॑व रु॒न्धे
रा॒ष्ट्रमे॒व भ॑व॒त्यात्म॑ने हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रं प्र॒जा रा॒ष्ट्रं प॒शवो॑
रा॒ष्ट्रं य॑च्छ्रे॒ष्ठो भ॑वति रा॒ष्ट्रेणै॒व रा॒ष्ट्रम॑व रु॒न्धे व॑सि॒ष्ठः स॒मा॒ना॒नां भ॑वति
ग्रा॒म॒का॒माय॑ हो॒तव्या॑ रा॒ष्ट्रं वै॑ रा॒ष्ट्रभृ॑तो रा॒ष्ट्रं स॒जा॒ता रा॒ष्ट्रेणै॒वास्मै॑
रा॒ष्ट्रं स॒जा॒ता॒नव॑ रु॒न्धे ग्रा॒म्ये – [] 22

3.4.8.1 - Padam

रा॒ष्ट्र॒का॒मा॒येति॑ रा॒ष्ट्र – का॒माय॑ । हो॒तव्याः॑ । रा॒ष्ट्रम् । वै । रा॒ष्ट्रभृ॑त इति॑
रा॒ष्ट्र – भृ॑तः । रा॒ष्ट्रेण॑ । ए॒व । अ॒स्मै । रा॒ष्ट्रम् । अ॒वेति॑ । रु॒न्धे ।
रा॒ष्ट्रम् । ए॒व । भ॑वति । आ॒त्म॒ने । हो॒तव्याः॑ । रा॒ष्ट्रम् । वै ।
रा॒ष्ट्रभृ॑त इति॑ रा॒ष्ट्र – भृ॑तः । रा॒ष्ट्रम् । प्र॒जेति॑ प्र – जा । रा॒ष्ट्रम् ।
प॒शवः॑ । रा॒ष्ट्रम् । यत् । श्रे॒ष्ठः । भ॑वति । रा॒ष्ट्रेण॑ । ए॒व । रा॒ष्ट्रम् ।

अवेति॑ । रुन्धे॑ । वसिष्ठः॑ । समानानाम्॑ । भवति॑ । ग्रामकामायेति॑
ग्राम॑ – कामाय॑ । होतव्याः॑ । राष्ट्रम्॑ । वै । राष्ट्रभृत॑ इति राष्ट्र-भृतः॑ ।
राष्ट्रम्॑ । सजाता॑ इति स – जाताः॑ । राष्ट्रेण॑ । एव॑ । अस्मै॑ । राष्ट्रम्॑ ।
सजातानिति॑ स – जातान्॑ । अवेति॑ । रुन्धे॑ । ग्रामी॑ । 22 (50)

3.4.8.2

–व भवत्यधिदेवने॑ जुहोत्यधिदेवन॑ एवास्मै॑ सजातानव॑ रुन्धे॑
त एनमवरुद्धा॑ उप॑ तिष्ठन्ते रथमुख॑ ओजस्कामस्य॑ होतव्या॑ ओजो॑ वै
राष्ट्रभृत॑ ओजो॑ रथ॑ ओजसैवास्मा॑ ओजोऽव॑ रुन्ध॑ ओजस्व्येव॑ भवति॑
यो राष्ट्रादपभूतः॑ स्यात् तस्मै॑ होतव्या॑ यावन्तोऽस्य॑ रथाः॑ स्युस्तान्
ब्रूयाद् युङ्ध्वमिति॑ राष्ट्रमेवास्मै॑ युनक्त्या॑ – [] 23

3.4.8.2 - Padam

एव॑ । भवति॑ । अधिदेवन॑ इत्यधि॑ – देवने॑ । जुहोति॑ । अधिदेवन॑
इत्यधि॑ – देवने॑ । एव॑ । अस्मै॑ । सजातानिति॑ स-जातान्॑ । अवेति॑ ।
रुन्धे॑ । ते॑ । एनम्॑ । अवरुद्धा॑ इत्यव॑ – रुद्धाः॑ । उपेति॑ । तिष्ठन्ते॑ ।
रथमुख॑ इति रथ॑ – मुखे॑ । ओजस्कामस्येत्योजः॑ – कामस्य॑ ।

होत॒व्याः । ओजः॑ । वै । रा॒ष्ट्रभृ॑त इति रा॒ष्ट्र-भृ॑तः । ओजः॑ । रथः॑ ।
ओज॑सा । ए॒व । अ॒स्मै । ओजः॑ । अ॒वेति॑ । रु॒न्धे । ओज॑स्वी ।
ए॒व । भ॒वति॑ । यः । रा॒ष्ट्रात् । अ॒पभृ॑त इत्य॒प - भृ॑तः । स्यात् ।
तस्मै॑ । होत॒व्याः । याव॑न्तः । अ॒स्य । रथाः॑ । स्युः॑ । तान् । ब्रू॒यात् ।
यु॒ङ्ध्वम् । इति॑ । रा॒ष्ट्रम् । ए॒व । अ॒स्मै । यु॒नक्ति॑ । 23 (50)

3.4.8.3

हु॒तयो॑ वा ए॒तस्या॑क्लृ॒प्ता यस्य॑ रा॒ष्ट्रं न क॑ल्पते स्वर॒थस्य॑ दक्षि॒णं
चक्रं॑ प्र॒वृह्य॑ ना॒डीम॑भि जुहु॒यादाहु॑तीरे॒वास्य॑ कल्पयति॒ ता अ॑स्य
कल्प॑माना रा॒ष्ट्रम॑नु कल्पते संग्रामे सँय॑त्ते होत॒व्या रा॒ष्ट्रं वै
रा॒ष्ट्रभृ॑तो रा॒ष्ट्रे खलु॑ वा ए॒ते व्या॑यच्छन्ते ये सङ्ग्रा॒मं सं य॑न्ति यस्य
पूर्व॑स्य जुह्वति॒ स ए॒व भ॒वति॑ जयति॒ तं संग्रामं॑ मा॒न्धुक

इ॒ध्मो- [] 24

3.4.8.3 - Padam

आहु॒तय॑ इत्या - हु॒तयः॑ । वै । ए॒तस्य॑ । अक्लृ॒प्ताः । यस्य॑ ।
रा॒ष्ट्रम् । न । कल्प॑ते । स्वर॒थस्येति॑ स्व - रथ॑स्य । दक्षि॒णम् ।

च॒क्रम् । प्र॒वृ॒ह्येति॑ प्र – वृ॒ह्य । ना॒डीम् । अ॒भीति॑ । जु॒हु॒यात् ।
 आ॒हु॒तीरि॒त्या – हु॒तीः । ए॒व । अ॒स्य । क॒ल्प॒यति॑ । ताः । अ॒स्य ।
 क॒ल्प॒मा॒नाः । रा॒ष्ट्रम् । अ॒न्वि॒ति । क॒ल्प॒ते । सं॒ग्रा॒म इति॑ सं – ग्रा॒मे ।
 सँ॒य॒त्त इति॑ सं – य॒त्ते । हो॒त॒व्याः॑ । रा॒ष्ट्रम् । वै । रा॒ष्ट्रभृ॑त इति॑
 रा॒ष्ट्र – भृ॑तः । रा॒ष्ट्रे । ख॒लु । वै । ए॒ते । व्या॒य॒च्छन्त॑ इति॑
 वि – आ॒य॒च्छन्ते॑ । ये । सं॒ग्रा॒ममि॑ति सं – ग्रा॒मम् । सँ॒य॒न्तीति॑
 सं-य॑न्ति । य॒स्य । पू॒र्व॒स्य । जु॒ह्वति॑ । सः । ए॒व । भ॒वति॑ । ज॒यति॑ ।
 तम् । सं॒ग्रा॒ममि॑ति सं – ग्रा॒मम् । मा॒न्धु॒कः । इ॒ध्मः । 24 (50)

3.4.8.4

भ॒वत्य॑ङ्गारा ए॒व प्र॒ति॒वेष्ट॑माना अ॒मि॒त्रा॒णाम॑स्य से॒नां
 प्र॒ति॒वेष्ट॑यन्ति य उ॒न्माद्ये॑त् तस्मै हो॒त॒व्या ग॑न्ध॒र्वा॒प्सर॑सो वा
 ए॒तमु॒न्मा॑दयन्ति य उ॒न्माद्य॑त्ये॒ते ख॒लु वै ग॑न्ध॒र्वा॒प्सर॑सो
 यद्वा॒ष्ट्रभृ॑तस्तस्मै स्वा॒हा ता॑भ्यः स्वा॒हेति॑ जु॒होति॑ तेनै॒वैना॑ञ्छमयति
 नै॒यग्रो॑ध औ॒दु॒म्बर॑ आ॒श्वत्थः॑ प्लाक्ष इती॒ध्मो भ॑वत्ये॒ते वै
 ग॑न्ध॒र्वा॒प्सर॑सां गृ॒हाः स्व॑ ए॒वैना॑ – [] 25

3.4.8.4 - Padam

भवति । अङ्गाराः । एव । प्रतिवेष्टमाना इति प्रति – वेष्टमानाः ।
अमित्राणाम् । अस्य । सेनाम् । प्रतीति । वेष्टयन्ति । यः ।
उन्माद्येदित्युत् – माद्येत् । तस्मै । होतव्याः । गन्धर्वाप्सरस इति
गन्धर्व – अप्सरसः । वै । एतम् । उदिति । मादयन्ति । यः ।
उन्माद्यतीत्युत् – माद्यति । एते । खलु । वै । गन्धर्वाप्सरस इति
गन्धर्व – अप्सरसः । यत् । राष्ट्रभृत इति राष्ट्र – भृतः । तस्मै ।
स्वाहा । ताभ्यः । स्वाहा । इति । जुहोति । तेन । एव । एनान् ।
शमयति । नैयग्रोधः । औदुम्बरः । आश्वत्थः । प्लाक्षः । इति । इध्मः ।
भवति । एते । वै । गन्धर्वाप्सरसामिति गन्धर्व – अप्सरसाम् ।
गृहाः । स्वे । एव । एनान् । 25 (50)

3.4.8.5

नायतने शमयत्यभिचरता प्रतिलोमं होतव्याः प्राणानेवास्य
प्रतीचः प्रति यौति तं ततो येन केन च स्तृणुते स्वकृत इरिणे
जुहोति प्रदरे वैतद्वा अस्यै निर्ऋतिगृहीतं निर्ऋतिगृहीत एवैनं

निर्ऋ॑त्या ग्रा॒हय॑ति यद्वाचः॑ कू॒रं तेन॑ वषट् करोति॑ वा॒च ए॒वैनं॑ कू॒रेण॑
प्रवृ॑श्चति ताजगा॑र्तिमाच्छति॑ यस्य॑ का॒मये॑तान्नाद्य – [] 26

3.4.8.5 - Padam

आ॒यत॑न इत्या॑ – यत॑ने । श॒मय॑ति । अ॒भिच॑रतेत्य॑भि – चर॑ता ।
प्र॒तिलो॑ममि॒ति प्र॒ति – लो॒मम् । हो॒तव्याः॑ । प्रा॒णानि॑ति प्र – अ॒नान् ।
ए॒व । अ॒स्य । प्र॒तीचः॑ । प्र॒तीति॑ । यौ॒ति । तम् । ततः॑ । येन॑ । केन॑ ।
च । स्तृ॑णुते । स्व॒कृत॑ इति॒ स्व – कृ॒ते । इ॒रिणे॑ । जु॒होति॑ । प्र॒दर॑
इति॑ प्र – द॒रे । वा । ए॒तत् । वै । अ॒स्यै । निर्ऋ॑तिगृही॒तमि॒ति
निर्ऋ॑ति – गृ॒हीत॑म् । निर्ऋ॑तिगृही॒त इति॑ निर्ऋ॑ति-गृ॒हीते॑ । ए॒व ।
ए॒नम् । निर्ऋ॑त्येति॒ निः-ऋ॑त्या । ग्रा॒हय॑ति । यत् । वा॒चः । कू॒रम् ।
तेन॑ । वषट् । क॒रोति॑ । वा॒चः । ए॒व । ए॒नम् । कू॒रेण॑ । प्रेति॑ ।
वृ॒श्चति॑ । ताजक् । आ॒र्तिम् । ए॒ति । ऋ॒च्छति॑ । यस्य॑ । का॒मये॑त ।
अ॒न्नाद्य॑मित्य॒न्न – अ॒द्यम् । 26 (50)

3.4.8.6

मा ददीयेति तस्य सभायामुत्तानो निपद्य भुवनस्य पत इति
तृणानि सं गृह्णीयात् प्रजापतिर्वै भुवनस्य पतिः
प्रजापतिनैवास्यान्नाद्यमा दत्त इदमहममुष्या ऽऽ*मुष्यायणस्यान्नाद्यं
हरामीत्याहान्नाद्यमेवास्य हरति षड्भिर्हरति षड्वा ऋतवः
प्रजापतिनैवास्या -न्नाद्यमादायर्तवोऽस्मा अनु प्रयच्छन्ति - [] 27

3.4.8.6 - Padam

एति । ददीय । इति । तस्य । सभायाम् । उत्तान इत्युत् - तानः ।
निपद्येति नि - पद्य । भुवनस्य । पते । इति । तृणानि । समिति ।
गृह्णीयात् । प्रजापतिरिति प्रजा - पतिः । वै । भुवनस्य । पतिः ।
प्रजापतिनेति प्रजा - पतिना । एव । अस्य ।
अन्नाद्यमित्यन्न - अद्यम् । एति । दत्ते । इदम् । अहम् । अमुष्य ।
आमुष्यायणस्य । अन्नाद्यमित्यन्न - अद्यम् । हरामि । इति । आह ।
अन्नाद्यमित्यन्न - अद्यम् । एव । अस्य । हरति ।
षड्भिरिति षट् - भिः । हरति । षट् । वै । ऋतवः ।

प्रजापतिनेति प्रजा-पतिना । एव । अस्य । अन्नाद्यमित्यन्न -अद्यम् ।
आदायेत्या-दायः । ऋतवः । अस्मै । अनु । प्रेति ।

यच्छन्ति । 27 (50)

3.4.8.7

यो ज्येष्ठबन्धुरप भूतः स्यात् त७स्थलेऽवसाय्य ब्रह्मौदनं चतुः
शरावं पक्त्वा तस्मै होतव्या वर्षम् वै राष्ट्रभृतो वर्षम् स्थलं
वर्षमणैवैनं वर्षम् समानानां गमयति चतुः शरावो भवति दिक्ष्वेव
प्रतितिष्ठति क्षीरे भवति रुचमेवास्मिन् दधात्युद्धरति शृतत्वाय
सर्पिष्वान् भवति मेध्यत्वाय चत्वार आर्षेयाः प्राश्नन्ति दिशामेव
ज्योतिषि जुहोति । 28

3.4.8.7 - Padam

यः । ज्येष्ठबन्धुरिति ज्येष्ठ - बन्धुः । अपभूत इत्यप - भूतः ।
स्यात् । तम् । स्थले । अवसाय्येत्यव - साय्य । ब्रह्मौदनमिति
ब्रह्म - ओदनम् । चतुः शरावमिति चतुः - शरावम् । पक्त्वा ।
तस्मै । होतव्याः । वर्षम् । वै । राष्ट्रभृत इति राष्ट्र - भृतः । वर्षम् ।

स्थलम् । वर्ष्मणा । एव । एनम् । वर्ष्म । समानानाम् । गमयति ।
चतुः शराव इति चतुः – शरावः । भवति । दिक्षु । एव । प्रतीति ।
तिष्ठति । क्षीरे । भवति । रुचम् । एव । अस्मिन् । दधाति । उदिति ।
हरति । शृतत्वायेति शृत – त्वाय । सर्पिष्वान् । भवति ।
मेध्यत्वायेति मेध्य-त्वाय । चत्वारः । आर्षेयाः । प्रेति । अश्नन्ति ।
दिशाम् । एव । ज्योतिषि । जुहोति । 28 (49)

(ग्रामी – युनक्ती – ध्मः – स्व एवैना – नन्नाद्यं – यच्छन्त्ये –
कान्न पञ्चाशच्च) (A8)

3.4.9.1

देविका निर्वपेत् प्रजाकामश्छन्दाँसि वै देविकाश्छन्दाँसीव
खलु वै प्रजाश्छन्दोभिरेवास्मै प्रजाः प्रजनयति प्रथमं धातारं
करोति मिथुनी एव तेन करोत्यन्वेवास्मा अनुमतिर्मन्यते राते राका प्र
सिनीवाली जनयति प्रजास्वेव प्रजातासु कुह्वा वाचं दधात्येता एव
निर्वपेत् पशुकामश्छन्दाँसि वै देविकाश्छन्दाँसी – [] 29

3.4.9.1 - Padam

दे॒वि॒काः । नि॒रि॒ति॒ । व॒पेत् । प्र॒जा॒का॒म॒ इति॑ प्र॒जा – का॒मः ।
छन्दा॑सि । वै । दे॒वि॒काः । छन्दा॑सि । इ॒व । ख॒लु । वै । प्र॒जा
इति॑ प्र॒जाः । छन्दा॑भिरिति॑ छन्दः – भिः । ए॒व । अ॒स्मै । प्र॒जा
इति॑ प्र – जाः । प्रेति॑ । ज॒न॒य॒ति॒ । प्र॒थ॒म॒म् । धा॒ता॒र॒म् । क॒रो॒ति॒ ।
मि॒थु॒नी । ए॒व । ते॒न । क॒रो॒ति॒ । अ॒न्वि॒ति॒ । ए॒व । अ॒स्मै ।
अ॒नु॒म॒ति॒रि॒त्य॒नु – म॒तिः । म॒न्य॒ते । रा॒ते । रा॒का । प्रेति॑ । सि॒नी॒वा॒ली ।
ज॒न॒य॒ति॒ । प्र॒जा॒स्वि॒ति॒ प्र – जा॒सु॒ । ए॒व । प्र॒जा॒ता॒स्वि॒ति॒
प्र – जा॒ता॒सु॒ । कु॒ह्वा॒ । वा॒च॒म् । द॒धा॒ति॒ । ए॒ताः । ए॒व । नि॒रि॒ति॒ ।
व॒पेत् । प॒शु॒का॒म॒ इति॑ प॒शु – का॒मः । छन्दा॑सि । वै । दे॒वि॒काः ।
छन्दा॑सि । 29 (50)

3.4.9.2

व॒ ख॒लु॒ वै प॒श॒व॒श्छन्दा॑भिरे॒वा॒स्मै प॒शून् प्र॒ज॒न॒य॒ति॒ प्र॒थ॒मं॒ धा॒ता॒रं॑
क॒रो॒ति॒ प्रै॒व ते॒न वा॒प॒य॒त्य॒न्वे॒वा॒स्मा अ॒नु॒म॒ति॒र्म॒न्य॒ते रा॒ते रा॒का प्र
सि॒नी॒वा॒ली ज॒न॒य॒ति॒ प॒शून्॒ ए॒व प्र॒जा॒ता॒न् कु॒ह्वा॒ प्रति॑ष्ठापयत्ये॒ता ए॒व

निर्व॑पेद्-ग्रा॒म॒का॒म॒श्छन्दा॑ऽसि॒ वै दे॒वि॒का॒श्छन्दा॑ऽसी॒ व॒ खलु॑ वै
ग्रा॒म॒श्छन्दा॑भि॒रेवा॒स्मै॒ ग्रा॒म॒ - [] 30

3.4.9.2 - Padam

इ॒व । खलु॑ । वै । प॒श॒वः । छन्दा॑भि॒रिति॑ छन्दः - भिः । ए॒व ।
अ॒स्मै । प॒शून् । प्रेति॑ । ज॒न॒य॒ति । प्र॒थ॒म॒म् । धा॒ता॒र॒म् । क॒रो॒ति ।
प्रेति॑ । ए॒व । तेन॑ । वा॒प॒य॒ति । अ॒न्वि॒ति । ए॒व । अ॒स्मै ।
अ॒नु॒म॒ति॒रि॒त्यनु॑ - म॒तिः । म॒न्य॒ते । रा॒ते । रा॒का । प्रेति॑ । सि॒नी॒वा॒ली ।
ज॒न॒य॒ति । प॒शून् । ए॒व । प्र॒जा॒ता॒निति॑ प्र-जा॒ता॒न् । कु॒ह्वा । प्र॒ती॒ति ।
स्था॒प॒य॒ति । ए॒ताः । ए॒व । नि॒रि॒ति । व॒पेत् । ग्रा॒म॒का॒म॒ इति॑
ग्रा॒म॒ - का॒मः । छन्दा॑ऽसि॒ वै । दे॒वि॒काः । छन्दा॑ऽसि॒ इ॒व ।
खलु॑ । वै । ग्रा॒मः । छन्दा॑भि॒रिति॑ छन्दः - भिः । ए॒व । अ॒स्मै ।
॥
ग्रा॒म॒म् । 30 (50)

3.4.9.3

म॒व॒ रु॒न्धे म॒ध्य॒तो धा॒ता॒रं॑ क॒रो॒ति म॒ध्य॒त ए॒वैनं॑ ग्रा॒म॒स्य॑ द॒धा॒त्ये॒ता ए॒व
निर्व॑पे॒ज्ज्यो॒गा॒म॒या॒वी छन्दा॑ऽसि॒ वै दे॒वि॒का॒श्छन्दा॑ऽसि॒ खलु॑ वा

ए॒त॒म॒भि॒ म॒न्य॒न्ते॒ यस्य॒ ज्यो॒गा॒म॒य॒ति॒ छ॒न्दो॒भि॒रे॒वैन॑-म॒ग॒दं॒ क॒रो॒ति॒
म॒ध्य॒तो॒ धा॒ता॒रं॑ क॒रो॒ति॒ म॒ध्य॒तो॒ वा॒ ए॒त॒स्या॒क्लृ॒प्तं॑ य॒स्य॒ ज्यो॒गा॒म॒य॒ति॒
म॒ध्य॒त॒ ए॒वा॒स्य॒ ते॒न॑ क॒ल्प॒य॒त्ये॒ता॒ ए॒व॒ नि॒ - [] 31

3.4.9.3 - Padam

अ॒वे॒ति॒ । रु॒न्धे॒ । म॒ध्य॒तः॑ । धा॒ता॒र॒म् । क॒रो॒ति॒ । म॒ध्य॒तः॑ । ए॒व॒ ।
ए॒न॒म् । ग्रा॒म॒स्य॒ । द॒धा॒ति॒ । ए॒ताः॑ । ए॒व॒ । नि॒रि॒ति॒ । व॒पे॒त् ।
ज्यो॒गा॒म॒या॒वी॒ति॒ ज्यो॒क् - आ॒म॒या॒वी॒ । छ॒न्दा॑सि॒ । वै॒ । दे॒वि॒काः॑ ।
छ॒न्दा॑सि॒ । ख॒लु॒ । वै॒ । ए॒त॒म् । अ॒भी॒ति॒ । म॒न्य॒न्ते॒ । य॒स्य॒ ।
ज्यो॒क् । आ॒म॒य॒ति॒ । छ॒न्दो॒भि॒रि॒ति॒ छ॒न्दः॑ - भिः॒ । ए॒व॒ । ए॒न॒म् ।
अ॒ग॒द॒म् । क॒रो॒ति॒ । म॒ध्य॒तः॑ । धा॒ता॒र॒म् । क॒रो॒ति॒ । म॒ध्य॒तः॑ । वै॒ ।
ए॒त॒स्य॒ । अ॒क्लृ॒प्त॒म् । य॒स्य॒ । ज्यो॒क् । आ॒म॒य॒ति॒ । म॒ध्य॒तः॑ । ए॒व॒ ।
अ॒स्य॒ । ते॒न॑ । क॒ल्प॒य॒ति॒ । ए॒ताः॑ । ए॒व॒ । नि॒रि॒ति॒ । 31 (50)

3.4.9.4

व॒पे॒द्यं॑ य॒ज्ञो॒ नो॒प॒न॒मे॒च्छ॒न्दा॑सि॒ वै॒ दे॒वि॒का॑श्छ॒न्दा॑सि॒ ख॒लु॒
वा॒ ए॒तं॑ नो॒प॒ न॒म॒न्ति॒ यं॑ य॒ज्ञो॒ नो॒प॒न॒म॒ति॒ प्र॒थ॒मं॑ धा॒ता॒रं॑ क॒रो॒ति॒ मु॒ख॒त॒

ए॒वास्मै॑ छ॒न्दा॑ꣳसि दधा॒त्युपै॑नं य॒ज्ञो न॑म॒त्येता॑ ए॒व
निर्व॑पेदी॒जानश्छ॒न्दा॑ꣳसि वै दे॒विका॑ या॒तया॑मानी॒व ख॒लु वा ए॒तस्य॑
छ॒न्दा॑ꣳसि य ई॒जान॑ उत्त॒मं धा॑ता॒रं करो॑ – [] 32

3.4.9.4 - Padam

व॒पेत् । यम् । य॒ज्ञः । न । उ॒प॒न॒मे॒दि॒त्युप॑ – न॒मेत् । छ॒न्दा॑ꣳसि । वै ।
दे॒विकाः॑ । छ॒न्दा॑ꣳसि । ख॒लु । वै । ए॒तम् । न । उ॒पे॒ति । न॒म॒न्ति ।
यम् । य॒ज्ञः । न । उ॒प॒न॒म॒ती॒त्युप॑ – न॒म॒ति । प्र॒थ॒मम् । धा॑ता॒रम् ।
क॒रो॒ति । मु॒ख॒तः । ए॒व । अ॒स्मै । छ॒न्दा॑ꣳसि । द॒धा॒ति । उ॒पे॒ति ।
ए॒नम् । य॒ज्ञः । न॒म॒ति । ए॒ताः । ए॒व । नि॒रि॒ति । व॒पेत् । ई॒जानः॑ ।
छ॒न्दा॑ꣳसि । वै । दे॒विकाः॑ । या॒तया॑मानी॒ति या॒त – या॒मा॒नि । इ॒व ।
ख॒लु । वै । ए॒तस्य॑ । छ॒न्दा॑ꣳसि । यः । ई॒जानः॑ ।

उ॒त्त॒म॒मि॒त्युत् – त॒मम् । धा॑ता॒रम् । क॒रो॒ति । 32 (50)

3.4.9.5

–त्यु॒परि॑ष्टादे॒वास्मै॑ छ॒न्दा॑ꣳस्यया॒तया॑मान्य॒व रु॒न्ध उ॒पै॒नमु॑त्त॒रो
य॒ज्ञो न॑म॒त्येता॑ ए॒व निर्व॑पेद्यं मे॒धा नो॒प॒न॒मे॒च्छ॒न्दा॑ꣳसि वै

दे॒विका॑श्छन्दा॒ऽसि॒ खलु॒ वा ए॒तं नो॒प नम॑न्ति॒ यं मे॒धा नो॒पन॑मति॒
प्रथ॑मं॒ धा॒तारं॑ करोति॒ मुख॑त ए॒वास्मै॒ छन्दा॑ऽसि॒ दधा॑त्युपै॒नं
मे॒धा नम॑त्ये॒ता ए॒व निर्व॑पे – [] 33

3.4.9.5 - Padam

उ॒परि॑ष्ठात् । ए॒व । अ॒स्मै । छन्दा॑ऽसि ।
अ॒या॒त॒या॒मा॒नी॒त्य॒या॒त – या॒मा॒नि । अ॒वे॒ति । रु॒न्धे । उ॒पे॒ति । ए॒नम् ।
उ॒त्तर॑ इ॒त्युत् – त॒रः । य॒ज्ञः । न॒म॒ति । ए॒ताः । ए॒व । नि॒रि॒ति । व॒पेत् ।
यम् । मे॒धा । न । उ॒प॒न॒मे॒दि॒त्यु॒प – न॒मे॒त् । छन्दा॑ऽसि । वै ।
दे॒वि॒काः । छन्दा॑ऽसि । खलु॒ । वै । ए॒तम् । न । उ॒पे॒ति । न॒म॒न्ति ।
यम् । मे॒धा । न । उ॒प॒न॒म॒ती॒त्यु॒प – न॒म॒ति । प्र॒थ॒मम् । धा॒तार॑म् ।
क॒रो॒ति । मु॒ख॒तः । ए॒व । अ॒स्मै । छन्दा॑ऽसि । द॒धा॒ति । उ॒पे॒ति ।
ए॒नम् । मे॒धा । न॒म॒ति । ए॒ताः । ए॒व । नि॒रि॒ति । व॒पेत् । 33 (50)

3.4.9.6

द्रु॒क्का॑मश्छन्दा॒ऽसि॒ वै दे॒विका॑श्छन्दा॒ऽसी॒व खलु॒ वै रुक्
छन्दा॑भिरे॒वास्मिन् रुचं॑ दधाति॒क्षी॒रे भ॑वन्ति॒ रुच॑मे॒वास्मिन् द॑धति

मध्यतो॑ धा॒तारं॑ करो॒ति मध्य॑त ए॒वैन॑ꣳ रु॒चो द॑धातिगाय॒त्री वा
 अनु॑मतिस्त्रि॒ष्टुग्रा॑का जगती॑ सिनीवा॒ल्यनु॑ष्टुप् कु॒हूर्धा॒ता व॑षट्कारः
 ॥ पूर्व॑पक्षो रा॒काऽपर॑पक्षः कु॒हूर॑मावा॒स्या सिनी॑वाली
 ॥ पौ॒र्णमा॒स्यनु॑मतिश्चन्द्र॑मा धा॒ताऽष्टौ॑ – [] 34

3.4.9.6 - Padam

रुक्काम॑ इति रुक्-कामः । छन्दाꣳसि॑ । वै । दे॒वि॒काः । छन्दाꣳसि॑ ।
 इव॑ । खलु॑ । वै । रुक् । छन्दो॑भिरिति छन्दः-भिः । ए॒व । अ॒स्मिन् ।
 ॥ रुच॑म् । द॒धा॒ति । क्षी॒रे । भ॒वन्ति॑ । रुच॑म् । ए॒व । अ॒स्मिन् । द॒ध॒ति ।
 ॥ मध्य॑तः । धा॒तार॑म् । करो॒ति । मध्य॑तः । ए॒व । ए॒नम् । रुचः॑ ।
 द॒धा॒ति । गा॒य॒त्री । वै । अनु॑मतिरित्यनु – म॒तिः । त्रि॒ष्टुक् । रा॒का ।
 जगती॑ । सिनी॒वाली॑ । अनु॑ष्टुबित्यनु – स्तुप् । कु॒हूः । धा॒ता ।
 व॑षट्कार इति वषट् – कारः । पूर्व॑पक्ष इति पूर्व – पक्षः । रा॒का ।
 अ॒पर॑पक्ष इत्यपर – पक्षः । कु॒हूः । अ॒मावा॒स्येत्य॑मा – वा॒स्या ।
 सिनी॒वाली॑ । पौ॒र्णमा॒सीति॑ पौ॒र्ण – मा॒सी । अनु॑मतिरित्यनु – म॒तिः ।
 ॥ चन्द्र॑माः । धा॒ता । अ॒ष्टौ । 34 (50)

3.4.9.7

वसवोऽष्टाक्षरा गायत्र्येकादश रुद्रा एकादशाक्षरा त्रिष्टुब्
द्वादशाऽऽदित्या द्वादशाक्षरा जगती प्रजापतिरनुष्टुब् धाता वषट्कार
एतद्वै देविकाः सर्वाणि च छन्दांसि सर्वाश्च देवता वषट्कारस्ता
यत् सह सर्वा निर्वपेदीश्वरा एनं प्रदहो द्वे प्रथमे निरुप्य धातुस्तृतीयं
निर्वपेत् तथो एवोत्तरे निर्वपेत् तथैनं न प्रदहन्त्य () थो यस्मै
कामाय निरुप्यन्ते तमेवाऽऽभिरुपाऽऽप्नोति । 35

3.4.9.7 - Padam

वसवः । अष्टाक्षरेत्यष्टा – अक्षरा । गायत्री । एकादश । रुद्राः ।
एकादशाक्षरेत्येकादश – अक्षरा । त्रिष्टुप् । द्वादश । आदित्याः ।
द्वादशाक्षरेति द्वादश-अक्षरा । जगती । प्रजापतिरिति प्रजा – पतिः ।
अनुष्टुबित्यनु-स्तुप् । धाता । वषट्कार इति वषट् – कारः । एतत् ।
वै । देविकाः । सर्वाणि । च । छन्दांसि । सर्वाः । च । देवताः ।
वषट्कार इति वषट् – कारः । ताः । यत् । सह । सर्वाः ।
निर्वपेदिति निः – वपेत् । ईश्वराः । एनम् । प्रदह इति प्र – दहः ।

द्वे इति । प्रथमे इति । निरुप्येति निः – उप्य । धातुः । तृतीयम् ।
 निरिति । वपेत् । तथो इति । एव । उत्तरे इत्युत् – तरे । निरिति ।
 वपेत् । तथा । एनम् । न । प्रेति । दहन्ति () । अथो इति । यस्मै ।
 कामाय । निरुप्यन्त इति निः – उप्यन्तै । तम् । एव । आभिः ।
 उपेति । आप्नोति । 35 (59) (पशुकामश्छन्दांसि वै
 देविकाश्छन्दांसि-ग्रामं-कल्पयत्येता एव नि-रुत्तमन्धातारं करोति
 – मेधा नमत्येता एव निर्वपे – दष्टौ – दहन्ति – नव च) (A9)

Special Korvai:

(देविकाः प्रजाकामो मिथुनी पशुकामः प्रैव ग्रामकामो ज्योगामयावी
 यं यज्ञो य ईजानो यं मेधा रुक्कामोऽष्टौ ।
 देविका भवन्ति दधति राष्ट्रकामाय भवति दधाति ।)

3.4.10.1

वास्तौष्पते प्रति जानी ह्यस्मान्त् स्वावेशो अनमीवो भवानः ।
 यत् त्वेमहे प्रतितन्नो जुषस्व शन्नऐधि द्विपदे शञ्चतुष्पदे ।
 वास्तौष्पते शग्मया सꣳ सदाते सक्षीमहि रण्वया गातुमत्या ।

आ॒वः॑ क्षे॒म उ॒त यो॒गे वर॑न्नो यू॒यं पा॒त स्व॒स्तिभिः॑ स॒दानः॑ ।

यथ् सा॒यं प्रा॒तर॒ग्निहो॒त्रं जु॒होत्याहु॑ती॒ष्टका॑ ए॒व ता उप॑

धत्ते – [] 36

3.4.10.1 - Padam

वा॒स्तौः॑ । प॒ते । प्र॒तीति॑ । जा॒नीहि॑ । अ॒स्मान् । स्वा॒वेश॑ इति॑
सु-आ॒वेशः॑ । अ॒नमी॒वः । भ॒व । नः॑ । यत् । त्वा । ई॒महे॑ । प्र॒तीति॑ ।
तत् । नः॑ । जु॒षस्व॑ । श॒म् । नः॑ । ए॒धि । द्वि॒पद॑ इति॑ द्वि – पदे॑ ॥
श॒म् । चतु॑ष्पद॒ इति॑ चतुः – पदे॑ । वा॒स्तौः॑ । प॒ते । श॒ग्मया॑ ॥
स॒स॒देति॑ सं – सदा॑ ॥ ते । स॒क्षीम॑हि । र॒ण्वया॑ । गा॒तुम॑त्येति॑
गा॒तु – म॒त्या ॥ आ॒वः । क्षे॒मे । उ॒त । यो॒गे । वर॑म् । नः॑ ।
यू॒यम् । पा॒त । स्व॒स्तिभि॑रिति॑ स्व॒स्ति – भिः॑ । सदा॑ । नः॑ । यत् ।
सा॒यंप्रा॑तरिति॑ सा॒यं – प्रा॒तः । अ॒ग्निहो॒त्रमि॑त्यग्नि – हो॒त्रम् ।
जु॒होति॑ । आ॒हुती॑ष्टका॒ इत्याहु॑ति – इ॒ष्टकाः॑ । ए॒व । ताः । उपे॑ति ।

धत्ते । 36 (50)

3.4.10.2

यज॑मानोऽहो॒रात्रा॑णि वा ए॒तस्ये॑ष्ट॒का य आ॑हि॒ताग्नि॑र्यथ्
सायं॑ प्रा॒तर्जु॑होत्यहो॒रात्रा॑ण्येवा ऽऽ*प्त्वे॑ष्ट॒काः कृ॒त्वोप॑ ध॒त्ते द॑श
समा॑नत्र जुहोति द॒शाक्ष॑रा वि॒राड् वि॒राज॑मेवाऽऽ*प्त्वे॑ष्ट॒कां कृ॒त्वोप॑
ध॒त्तेऽथो॑ वि॒राज्ये॑व य॒ज्ञमा॑प्नोति चि॒त्यश्चि॑त्योऽस्य भवति तस्मा॑द्यत्र
द॒शोषि॑त्वा प्र॒याति॑ तद्-य॒ज्ञवा॑स्त्ववा॒स्त्वेव॑ तद्यत्
ततो॑ऽर्वा॒चीन॑ - [] 37

3.4.10.2 - Padam

यज॑मानः । अ॒हो॒रात्रा॑णीत्यहः-रा॒त्राणि॑ । वै । ए॒तस्य॑ । इ॒ष्टकाः॑ । यः ।
आ॑हि॒ताग्नि॑रित्या॒हित - अ॒ग्निः । यत् । सा॒यंप्रा॑तरिति सा॒यं-प्रा॑तः ।
जुहो॑ति । अ॒हो॒रात्रा॑णीत्यहः - रा॒त्राणि॑ । ए॒व । आ॒प्त्वा । इ॒ष्टकाः॑ ।
कृ॒त्वा । उपे॑ति । ध॒त्ते । द॑श । समा॑नत्र । जुहो॑ति । द॒शाक्ष॑रेति
द॑श - अ॒क्षरा॑ । वि॒राडिति॑ वि - राट् । वि॒राज॑मिति वि - राज॑म् ।
ए॒व । आ॒प्त्वा । इ॒ष्टकाम्॑ । कृ॒त्वा । उपे॑ति । ध॒त्ते । अथो॑ इति ।
वि॒राजी॑ति वि - राजि॑ । ए॒व । य॒ज्ञम् । आ॒प्नो॑ति ।

चित्यश्चित्य इति चित्यः – चित्यः । अस्य । भवति । तस्मात् ।
यत्र । दश । उषित्वा । प्रयातीति प्र – याति । तत् ।
यज्ञवास्त्विति यज्ञ-वास्तु । अवास्तु । एव । तत् । यत् । ततः ।
अर्वाचीनम् । 37 (50)

3.4.10.3

रुद्रः खलु वै वास्तोष्पतिर्यदहुत्वा वास्तोष्पतीयं प्रयायाद् रुद्र एनं
भूत्वाऽग्निरनूत्थाय हन्याद्वास्तोष्पतीयं जुहोति भागधेयेनैवैनं
शमयति नाऽऽ*र्तिमाच्छति यजमानो यद्युक्ते जुहुयाद्यथा प्रयाते
वास्तावाहुतिं जुहोति तादृगेव तद्यद्युक्ते जुहुयाद्यथा क्षेम आहुतिं
जुहोति तादृगेव तदहुतमस्य वास्तोष्पतीयं स्या – [] 38

3.4.10.3 - Padam

रुद्रः । खलु । वै । वास्तोष्पतिरिति वास्तोः-पतिः । यत् । अहुत्वा ।
वास्तोष्पतीयमिति वास्तोः – पतीयम् । प्रयायादिति प्र – यायात् ।
रुद्रः । एनम् । भूत्वा । अग्निः । अनूत्थायेत्यनु – उत्थाय । हन्यात् ।
वास्तोष्पतीयमिति वास्तोः – पतीयम् । जुहोति ।

भा॒ग॒धे॒ये॒ने॒ति॑ भा॒ग – धे॒ये॒न॑ । ए॒व । ए॒न॒म् । श॒म॒य॒ति॑ । न॒ । आ॒र्ति॑म् ।
ए॒ति॑ । ऋ॒च्छ॒ति॑ । य॒ज॒मा॒नः॑ । यत् । यु॒क्ते॑ । जु॒हु॒यात् । य॒था॑ । प्र॒या॒त॒
इ॒ति॑ प्र – या॒ते॑ । वा॒स्तौ॑ । आ॒हु॒ति॒मि॒त्या–हु॒ति॒म् । जु॒हो॒ति॑ । ता॒दृक् ।
ए॒व । तत् । यत् । अ॒यु॒क्ते॑ । जु॒हु॒यात् । य॒था॑ । क्षे॒मे॑ ।
आ॒हु॒ति॒मि॒त्या – हु॒ति॒म् । जु॒हो॒ति॑ । ता॒दृक् । ए॒व । तत् । अ॒हु॒त॒म् ।
अ॒स्य॑ । वा॒स्तो॒ष्प॒ती॒य॒मि॒ति॑ वा॒स्तोः – प॒ती॒य॒म् । स्या॒त् । 38 (50)

3.4.10.4

दक्षि॑णो यु॒क्तो भव॑ति स॒व्योऽयु॒क्तोऽथ॑ वा॒स्तो॒ष्प॒ती॒यं जु॒हो॒त्यु॒भय॑मे॒वाऽ
क॒र॒प॒रि॒व॒र्ग॒मे॒वैन॑ ऽ श॒म॒य॒ति॑ य॒दे॒क॒या जु॒हु॒याद्द॒र्वि॒हो॒मं कु॑र्यात्
पु॒रोऽनु॒वा॒क्या म॒नू॒च्य या॒ज्य॒या जु॒हो॒ति स॒दे॒व॒त्वाय॑ य॒द्धु॒त आ॒द॒ध्याद्
रु॒द्रं गृ॒हा॒न॒न्वा॒रो॒ह॒येद्–य॒द॒व॒क्षा॒णान् य॒सं प्र॒क्षा॒प्य प्र॒या॒याद्य॑था
य॒ज्ञ॒वे॒श॒सं वा॑ऽऽद॒हनं॑ वा॒ ता॒दृगे॒व त॒द॒य॒न्ते॒ यो॒निर्ऋ॒त्विय॑ इ॒त्य॒रण्योः॑
स॒मा॒रो॒ह॒य – [] 39

3.4.10.4 - Padam

दक्षिणः । युक्तः । भवति । सव्यः । अयुक्तः । अथ ।
वास्तोष्पतीयमिति वास्तोः - पतीयम् । जुहोति । उभयम् । एव ।
अकः । अपरिवर्गमित्यपरि - वर्गम् । एव । एनम् । शमयति । यत् ।
एकया । जुहुयात् । दर्विहोममिति दर्वि - होमम् । कुर्यात् ।
पुरोनुवाक्यामिति पुरः - अनुवाक्याम् । अनूच्येत्यनु - उच्य ।
याज्यया । जुहोति । सदेवत्वायेति सदेव - त्वाय । यत् । हुते ।
आदध्यादित्या - दध्यात् । रुद्रम् । गृहान् ।
अन्वारोहयेदित्यनु - आरोहयेत् । यत् ।
अवक्षाणानीत्यव - क्षाणानि । असंप्रक्षाप्येत्यसं - प्रक्षाप्य ।
प्रयायादिति प्र - यायात् । यथा । यज्ञवेशसमिति यज्ञ - वेशसम् ।
वा । आदहनमित्या - दहनम् । वा । तादृक् । एव । तत् । अयम् ।
ते । योनिः । ऋत्वियः । इति । अरण्योः ।
समारोहयतीति सं - आरोहयति । 39 (50)

3.4.10.5

–त्येष वा अग्नेर्योनिः स्व एवैनं योनौ समारोहयत्यथो
खल्वाहु॑र्यद॑रण्योः॑ समा॑रूढो नश्ये॑दुद॑स्याग्निः॑ सीदेत् पुनरा॑धेयः॑
स्यादिति॑ या ते॑ अग्ने॑ यज्ञिया॑ तनू॑स्तये॒ह्या रो॒हेत्या॑त्मन्त् समारो॑हयते
यज॑मानो वा अग्नेर्योनिः॑ स्वायामे॑वैनं योन्या॑ꣳ समारो॑हयते । 40

3.4.10.5 - Padam

ए॒षः । वै । अग्नेः॑ । योनिः॑ । स्वे । ए॒व । ए॒नम् । यो॒नौ ।
समा॑रो॒हय॑तीति सं-आरो॑हयति । अथो॑ इति । खलु॑ । आ॒हुः । यत् ।
अ॒रण्योः॑ । समा॑रूढ इति सं-आरू॑ढः । नश्ये॑त् । उ॒दि॒ति । अ॒स्य ।
अ॒ग्निः । सी॒दे॒त् । पुनरा॑धेय इति पुनः – आ॒धेयः॑ । स्यात् । इति ।
या । ते॑ । अग्ने॑ । य॒ज्ञिया॑ । तनूः॑ । तया॑ । ए॒ति । इ॒हि । ए॒ति । रो॒ह ।
इति॑ । आ॒त्मन् । समा॑रो॒हय॑त इति सं-आरो॑हयते । यज॑मानः । वै ।
अग्नेः॑ । योनिः॑ । स्वायाम् । ए॒व । ए॒नम् । यो॒न्याम् । समा॑रो॒हय॑त
इति॑ सं – आरो॑हयते । 40 (45) (ध॒त्ते- ऽर्वा॑चीनꣳ – स्यात्-
समा॑रो॒हय॑ति – पञ्च॑चत्वारिꣳश॑च्च) (A10)

3.4.11.1

त्वमग्ने॑ बृ॒हद्वयो॑ दधा॑सि दे॒व दा॒शुषे॑ । क॒विर्गृ॑हपतिर्यु॒वा ।
ह॒व्यवा॑ड॒ग्निरज॑रः पि॒ता नो॑ वि॒भुर्वि॑भा॒वा सु॒दृशी॑को अ॒स्मे ।
सु॒गार्.ह॑प॒त्याः समि॑षो दि॒दीह्य॑स्मद्रि॒यख्सं॑ मिमी॒हि श्रवा॑सि ।
त्वं च॑ सोम॒ नो व॑शो जी॒वातुं॑ न म॒रामहे॑ । प्रि॒यस्तौ॑त्रो वनस्पतिः ।
ब्र॒ह्मा दे॒वानां॑ पद॒वीः क॒वीना॑मृषिर्वि॒प्राणां॑ म॒हिषो॑ मृ॒गाणां॑ ।
श्ये॒नो गृ॑ध्राणा॒ऽस्वधि॑ति॒ र्वनाना॑ऽसोमः॑ – [] 41

3.4.11.1 - Padam

त्वम् । अ॒ग्ने । बृ॒हत् । व॒यः । दधा॑सि । दे॒व । दा॒शुषे॑ । क॒विः ।
गृ॒हप॑तिरिति॒ गृ॒ह – प॒तिः । यु॒वा । ह॒व्यवा॑डिति॒ ह॒व्य – वा॒ट् ।
अ॒ग्निः । अ॒जरः । पि॒ता । नः । वि॒भुरिति॑ वि – भुः । वि॒भावे॑ति
वि – भा॒वा । सु॒दृशी॑क इति॒ सु – दृ॒शीकः॑ । अ॒स्मे इति॑ ।
सु॒गार्.ह॑प॒त्या इति॒ सु – गा॒र्.ह॑प॒त्याः । समि॑ति । इ॒षः । दि॒दीहि॑ ।
अ॒स्मद्रि॒यगि॑त्यस्म – द्रि॒यक् । समि॑ति । मिमी॒हि । श्रवा॑सि ।
त्वम् । च॑ । सोम॒ । नः । व॑शः । जी॒वातु॑म् । न । म॒रामहे॑ ।

प्रि॒यस्तो॑त्र इति॒ प्रि॒य – स्तो॑त्रः । व॒नस्प॑तिः । ब्र॒ह्मा । दे॒वाना॑म् ।
प॒दवी॑रिति॒ पद॑ – वीः । क॒वीना॑म् । ऋ॒षिः । वि॒प्राणा॑म् । म॒हिषः॑ ।
मृ॒गाणा॑म् । श्ये॒नः । गृ॒ध्राणा॑म् । स्व॒धिति॑रिति॒ स्व – धि॒तिः ।
व॒नाना॑म् । सोमः॑ । 41 (50)

3.4.11.2

प॒वि॒त्रम॑त्येति॒ रेभ॑न् । आ वि॒श्वदे॑वꣳ स॒त्पतिꣳ सू॒क्तैर॑द्या वृ॒णीम॑हे ।
स॒त्यस॑वꣳ स॒वितारं॑ । आस॒त्येन॑ रज॒सा वर्त॑मानो नि॒वेश॑यन्नमृतं
मर्त्य॑ञ्च । हि॒रण्य॑येन स॒विता र॑थेनाऽऽ* दे॒वोया॑ति भु॒वना वि॑पश्यन् ।
यथा॑ नो अ॒दितिः॑ क॒रत् प॑श्चे नृ॒भ्यो यथा॑ ग॒र्वे । यथा॑ तो॒काय॑
रु॒द्रियं॑ । मा न॒स्तोके॑ त॒नये॑ मा न॒ आयु॑षि मा नो गो॒षु मा – [] 42

3.4.11.2 - Padam

प॒वि॒त्रम् । अ॒तीति॑ । ए॒ति । रेभ॑न् । ए॒ति । वि॒श्वदे॑वमिति॒
वि॒श्व – दे॒वम् । स॒त्पति॑मिति॒ सत् – प॒तिम् । सू॒क्तैरिति॑ सु॒उक्तैः॑ ।
अ॒द्य । वृ॒णीम॑हे । स॒त्यस॑वमिति॒ स॒त्य – स॒वम् । स॒वितार॑म् । ए॒ति ।
स॒त्येन॑ । रज॒सा । वर्त॑मानः । नि॒वेश॑यन्निति॒ नि॒वेश॑यन् । अ॒मृत॑म् ।

मर्त्यम् । च । हिरण्ययेन । सविता । रथेन । एति । देवः । याति ।
भुवना । विपश्यन्निति वि-पश्यन् । यथा । नः । अदितिः । करत् ।
पश्चे । नृभ्य इति नृ - भ्यः । यथा । गवे । यथा । तोकाय ।
रुद्रियम् । मा । नः । तोके । तनये । मा । नः । आयुषि । मा । नः ।
गोषु । मा । 42 (50)

3.4.11.3

नो अश्वेषु रीरिषः । वीरान् मानो रुद्र भामितो वधीर्हविष्मन्तो नमसा
विधेम ते । उदप्लुतो न वयो रक्षमाणा वावदतो अभ्रियस्येव घोषाः ।
गिरिभ्रजो नोर्मयो मदन्तो बृहस्पतिमभ्यर्का अनावन् ।
ह॒सैरिव सखिभिर्वावदद्भिरश्मन्मयानि नहना व्यस्यन् ।
बृहस्पतिरभिकनिक्रदद्वा उत प्रास्तौदुच्च विद्वा॑ अगायत् ।
एन्द्र॑ सानसि॑ रयि॑ - [] 43

3.4.11.3 - Padam

नः । अश्वेषु । रीरिषः । वीरान् । मा । नः । रुद्र । भामितः । वधीः ।
हविष्मन्तः । नमसा । विधेम । ते । उदप्लुत इत्युद - प्लुतः । न ।

वयः । रक्ष॑माणाः । वाव॑दतः । अभ्रि॑यस्य । इ॒व । घो॑षाः । गि॒रिभ्रज॑
इति॑ गि॒रि – भ्रजः॑ । न । ऊ॒र्मयः॑ । म॒दन्तः॑ । बृ॒हस्प॑तिम् । अ॒भीति॑ ।
अ॒र्काः । अ॒नाव॑न् । ह॒सैः । इ॒व । स॒खिभि॑रिति स॒खि – भिः॑ ।
वाव॑दद्भिरिति वाव॑दत् – भिः॑ । अ॒श्मन्म॑यानीत्य॒श्मन् – म॑यानि ।
न॒ह॒ना । व्य॑स्यन्निति वि – अ॒स्यन् । बृ॒हस्प॑तिः ।
अ॒भिक॑निक्र॒ददित्य॑भि – क॒निक्र॑दत् । गाः । उ॒त । प्रे॑ति । अ॒स्तौत् ।
उ॒दिति॑ । च । वि॒द्वान् । अ॒गाय॑त् । ए॒ति । इ॒न्द्र । सा॒नसि॑म् ।

रयि॑म् । 43 (50)

3.4.11.4

स॒जित्वा॑नꣳ स॒दास॑हं । व॒र्षि॑ष्ठमू॒तये॑ भर ।
प्र॒ससा॑हिषे पु॒रुहू॑त श॒त्रून् ज्ये॑ष्ठस्ते शु॒ष्म इ॒ह रा॑तिरस्तु ।
इ॒न्द्राऽऽ* भर॑ दक्षि॒णेना॑ व॒सूनि॑ पतिः सि॒न्धूना॑मसि रे॒वती॑नां ।
त्वꣳ सु॒तस्य॑ पी॒तये॑ स॒द्यो वृ॑द्धो अ॒जाय॑थाः । इ॒न्द्र ज्यै॑ष्ठ्याय
सु॒क्रतो॑ । भुव॑स्त्वमि॒न्द्र ब्र॑ह्म॒णा म॒हान् भुवो॑ विश्वे॒षु स॑वनेषु य॒ज्ञियः॑ ।
भुवो॑ नृꣳश्च्यौ॒तो विश्व॑स्मिन् भ॒रे ज्ये॑ष्ठश्च मन्त्रो – [] 44

3.4.11.4 - Padam

स॒जित्वा॑नमि॒ति स – जि॒त्वा॑नम् । स॒दास॒हमि॒ति सदा – स॒हम् ।
वर्षि॑ष्ठम् । ऊ॒तये॑ । भ॒र । प्रे॒ति । स॒साहि॑षे । पु॒रुहू॑तेति पु॒रु – हू॒त ।
श॒त्रून् । ज्ये॑ष्ठः । ते । शु॒ष्मः । इ॒ह । रा॒तिः । अ॒स्तु । इ॒न्द्र । ए॒ति ।
भ॒र । दक्षि॑णेन । व॒सूनि॑ । प॒तिः । सि॒न्धूना॑म् । अ॒सि । रे॒वती॑नाम् ।
त्वम् । सु॒तस्य॑ । पी॒तये॑ । स॒द्यः । वृ॒द्धः । अ॒जाय॑थाः । इ॒न्द्र ।
ज्यै॑ष्ठ्याय । सु॒क्रतो॑ इति सु॒क्रतो॑ । भुवः॑ । त्वम् । इ॒न्द्र । ब्र॒ह्मणा॑ ।
म॒हान् । भुवः॑ । वि॒श्वेषु॑ । स॒वने॑षु । य॒ज्ञियः॑ । भुवः॑ । नृ॒न् । च्यौ॒तः ।
वि॒श्वस्मि॑न् । भ॒रे॑ । ज्ये॑ष्ठः । च । म॒न्त्रः । 44 (50)

3.4.11.5

वि॒श्वच॑र्षणे ।
मि॒त्रस्य॑ च॒र्षणी॑धृतः श्रवो॑ दे॒वस्य॑ सा॒नसिं॑ । स॒त्यं चि॒त्र श्रव॑स्तमं ।
मि॒त्रो ज॒नान् या॑तयति प्र॒जानन् मि॒त्रो दा॑धार पृथि॒वीमु॑त द्यां ।
मि॒त्रः कृ॒ष्टीर॑निमि॒षाऽभि॑ च॒ष्टे स॒त्याय॑ ह॒व्यं घृ॑तवद्-वि॒धेम॑ ।
प्र॒समि॑त्र॒ मर्तो॑ अ॒स्तु प्र॑यस्वा॒न् यस्त॑ आ॒दित्य॑ शि॒क्षति॑ व्र॒तेन॑ ।

न ह॒न्यते॑ न जी॒यते॑ त्वो॒तो नै॒नम॑हो अ॒श्नो॒त्यन्ति॑तो न दू॒रात् ।

य- [] 45

3.4.11.5 - Padam

वि॒श्वच॑र्ष॒ण इति॑ वि॒श्व - च॑र्ष॒णे । मि॒त्रस्य॑ । च॑र्ष॒णीधृ॑त इति॑
च॑र्ष॒णी - धृ॑तः । श्रवः॑ । दे॒वस्य॑ । सा॒नसि॑म् । स॒त्यम् ।
चि॒त्रश्र॑वस्त॒ममि॑ति चि॒त्रश्र॑वः - त॒मम् । मि॒त्रः । ज॒नान् । या॒तय॑ति ।
प्र॒जा॒नन्नि॑ति प्र - जा॒नन् । मि॒त्रः । दा॒धार । पृ॒थि॒वीम् । उ॒त । द्या॑म् ।
मि॒त्रः । कृ॒ष्टीः । अ॒नि॒मि॒षेत्य॑नि - मि॒षा । अ॒भी॒ति । च॒ष्टे । स॒त्याय॑ ।
ह॒व्यम् । घृ॒तव॑दि॒ति घृ॒त-व॑त् । वि॒धेम॑ । प्रे॒ति । सः । मि॒त्र । म॒र्तः ।
अ॒स्तु । प्र॑यस्वान् । यः । ते । आ॒दि॒त्य । शि॒क्ष॑ति । व्र॒तेन॑ । न ।
ह॒न्यते॑ । न । जी॒यते॑ । त्वो॒तः । न । ए॒नम् । अ॒हः । अ॒श्नो॒ति ।
अ॒न्ति॑तः । न । दू॒रात् । यत् । 45 (50)

3.4.11.6

चि॒द्धि ते॑ वि॒शो यथा॑ प्र॒दे॒व व॑रुण व्र॒तं । मि॒नी॒मसि॑ द्यवि॒द्यवि॑ ।
यत् किञ्चे॒दं व॑रुण दै॒व्ये ज॑ने॒भि॒द्रो॒हं म॑नु॒ष्याश्च॑राम॒सि ।

अचि॒त्ती॒यत् तव॑ ध॒र्मा यु॒योपि॒ममा॑ न॒स्तस्मा॑ दे॒नसो॑ दे॒व री॒रिषः॑ ।
कि॒तवा॒सो य॒द्रि रि॒पुर्न॑ दी॒वि य॒द्वा घा॑ स॒त्य मु॒तय॑न्न वि॒द्म ।
सर्वा॑ ता वि॒ष्य शि॒थिरे॑ () व दे॒वाथा॑ ते स्या॒म वरु॑ण प्रि॒यासः॑ । 46

3.4.11.6 - Padam

चि॒त् । हि । ते । वि॒शः । य॒था । प्रे॒ति । दे॒व । वरु॑ण । व्र॒तम् ।
मि॒नीम॑सि । द्य॒विद्य॑वीति॒ द्यवि॑ – द्य॒वि । यत् । कि॒म् । च । इ॒दम् ।
वरु॑ण । दै॒व्यै॑ । जने॑ । अ॒भिद्रो॑हमि॒त्यभि॑ – द्रो॒हम् । म॒नुष्याः॑ ।
च॒राम॑सि । अचि॒त्ती । यत् । तव॑ । ध॒र्मा । यु॒योपि॒म । मा । नः॑ ।
तस्मा॑त् । ए॒नसः॑ । दे॒व । री॒रिषः॑ । कि॒तवा॒सः । यत् । रि॒रिपुः॑ । न ।
दी॒वि । यत् । वा । घ । स॒त्यम् । उ॒त । यत् । न । वि॒द्म । सर्वा॑ ।
ता । वी॒ति । स्य । शि॒थिरा॑ () । इ॒व । दे॒व । अथ॑ । ते । स्या॒म ।
वरु॑ण । प्रि॒यासः॑ । 46 (57) (सो॒मो-गो॒षु मा- रयि॑ – म॒न्त्रो – य –
च्छि॑थि॒रा – स॒प्त च॑) (A11)

पद पाठे (वाक्य सहित) – तृतीयकाण्डे – चतुर्थः प्रश्नः

Prasna Korvai with starting Padams of 1 to 11 Anuvaakams :-

(वि वा ए॒तस्या॑ – ऽ॒वा॒यो – इ॒मे वै – चि॒त्त॒ञ्चा – ऽग्नि॑भू॒तानां॑ –
दे॒वा वा अ॒भ्या॒ताना॑ – नृ॒ता॒षाड् – रा॒ष्ट्र॒का॒माय॑ – दे॒वि॒का –
वा॒स्तौ॑ष्प॒ते – त्वम॑ग्ने बृ॒ह – दे॒का॒द॒श)

Korvai with starting Padams of 1, 11, 21 Series of Panchaatis :-

(वि वा ए॒तस्ये॑ – त्या॒ह – मृ॒त्युर्गन्ध॑र्वो – ऽव॑ रु॒न्धे म॒द्ध्य॒त –
स्त्वम॑ग्ने बृ॒ह॒त् – षट्च॑त्वारि॒ंश॒त्)

First and Last Padam of Fourth Prasnam of Kandam 3 :-

(वि वा ए॒तस्य॑ – प्रि॒या॒सः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

तृतीयकाण्डे चतुर्थः प्रश्नः समाप्तः ॥

पद पाठे (वाक्य सहित) – तृतीयकाण्डे – चतुर्थः प्रश्नः

Details of Panchati and Padam for Kandam 3 – Prasanam 4 – TS 3.4

	Panchati	Padams
Anuvakam 1	4	221
Anuvakam 2	2	113
Anuvakam 3	8	392
Anuvakam 4	1	75
Anuvakam 5	1	67
Anuvakam 6	2	118
Anuvakam 7	3	146
Anuvakam 8	7	349
Anuvakam 9	7	359
Anuvakam 10	5	245
Anuvakam 11	6	307
Total →	46	2392

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in